

2 Koridi

Koridi Mwaalyaraavina Poli Pikarya Pigasaalya' Yidavakesi.

1 ¹ Koridi Mwaalyaihi, nya'mweihi
Polinyi Gotiyare simunyavi Kiraazitiyai Jizaazai gaminyineba nyidaasadeinyi nyidahilakakeinyi pikarya da' yihithawasiwaabe. Nimiji neya'mwei Timotilyi sainaai Gotiyare kusilaanyaviyaihi anga Koridi mwaaihasaihilyi Piroviji Giriza yuneba Gotiyare tewaanyara mwaaihasaraji sahirina yihithiwoi. ² Gotiyai Nenimaangelyi Naanga Jizaazai Kiraazitiya kwalyi yanga gaimwange'na tewaanna yihika! Yakilyiyagaa' kwaamu'nanyaburi tewaanna yihimwaihika!

Gotiyai kugaimwaga' Poli suya widake'nesi.

³ Gotiyari yilaaya nayaa maryaana! Sai Gotiyai nemire Naanga Jizaazai Kiraazitiyari Ganimaangelyi. Yi sai Nimwai kale'na gaimwanga naange'na aaya kaavilyalyi. Yi sai Gotiyai a'mwe yuyaraavire simunyavi taanginya yuyanna yivaimwadelyi. ⁴ Sahwai yuya taanginya neyima'nadengina nemire simunyavi nayaa neyivaimwadelyi. Sarevidaa'nyi Gotiyai nemire simunyavi neyivaimwadevaabisavi yi nemi sareina a'mweraavire simunyavi taanginya gazasa' kininnakeraavi yiniga wi'na yivaimwagaanneine. ⁵ Neyivaimwade sa' dare'nanyi. Daanga naange' Kiraazitiyai maarakesi. Nabaai nemi kwainaji ma'daanyasi. Yi daange' yune naanga neyima'nadevaabi' yi nabaai Kiraazitiyari nemire simunyavi yivaimwangebwi yune naanga neyima'nade'nanyi. ⁶ Nabaai nemi taanginya' maraaja daza' Gotiyai sariminyine simunyavi yihivaimwagya'nesi sahwai yihivadaihasamaarya'nesi sara yima'nade'nanyi. Yi nabaai Gotiyai nemire simunyavi neyivaimwagaza' yi sa' sarimire simunya kiriviji yivaimwagathesi. Nabaai Gotiyai sarimire simunyangi kave kihyoji yi nemi daanga ma'daanyabaaibi' sarimi sasare maapija' diraginna daavapiji nayaa jide'nanyi. ⁷ Nemi dara yawi'manigo.

Sarimi daange' nemiji ye'mwannamaa'manigatabaaibi' nabaai sarimire simunyavi neminyiji yivaimwangebwi dineye'mwannamaaryideihilyi. Yi sare'na nemi diraginna dara yemwaidaanyi. Yi sarimi diraginna dithaayideihilyi.

⁸Sare' darevinyi. Nya'mweihi, nemire simunyavi dara yawi'manigo. Neminyi Piroviji Eziya dazavi neyima'nake' taanginya dazavina sarimi jawiranganyila! Taanginya naanga sa' nemarulawakakesi. Yada yi nemire diraginyavi nebulya'na wawilava'. Sarevidaa'nyi yi nemi dara yawiro. Nemi gaalyaina mwalaadeina daaka! Nemi balaadeinera. ⁹Naanga nebulya'nanyasi. Nemi saina taanginya' yibwakimanigo. Yawibwa'dei mena dakabaaibi' nemi balaade'na. Yi Gotiyai “Kumi kunnya diraginya sabwina nyawiralimwagapidika! Aawa. Nimi a'mwe bainikeraavi ayahi yidikaa'dinyainyi nayaa yawiralimwagapika!” kada' sasare sa' yima'nakesi. ¹⁰Kayaa'nanaanga daza neminyi kayaa'na neramakadaasi Gotiyai sahwai neminyi ayina nevadaihasamaarakelyi. Yi nabaai dahaa' sahwai kuna nevadaihasamaa'manikelyi. Yi nemi sahwarina diraginna limwadaa nayaa dara yemwaaimanigo inera “Yi nabaai divi kigaasi sahwai ayina nevadaihasamaaradelyi.” ¹¹Yi sarimi Gotiyari wija'na neminyi nayaa ye'mwannanegaimwadaapiji sara nevadaihasamaaradelyi. Sarevidaa'nyi Gotiyai a'mwe kwalaalyaraavire yidaanganya' kadika wi'nada yi sahwai yanga tewaanna neyaja'na yi yuya kwalaalya dazara wi'napiji yi neminyina Gotiyari “Su! Su!” widipi'derera kwala naangera. Yi “Sare' yima'nana!” dona yihithiwo.

Poli Koridi mwaalyaraavi kwaasi mujake'nesi.

¹²Sare' darevinyi. Nemi neminyine yaya' munyaba makinya' yaasiwa'na mi'. Aawa. Sare' daresi. Nemire simunyai padahirakayi dara jalikurakadelyi. Kwaaka davaki mwaalyaraayawi nemi kaanya yamaryadaanyanna nawi'nya yagoinera. Yi nabaai sariminyi nawi'nya naanga yagoinera. Yi daresi. Gotiyai neminyi tewaanaanga sabwinaji yida'nanya nebulya'nanyabwinaji nejaavadevuri sara yagovulyi. A'mwe kilaakejikiyabulyiyaraavire sidusabwi nemarima'naabadevwi mi'. Aawa. Gotiyare yune yanga gaimwange'na negaimwadaasi nemi kaanya sasara yamaryoinera. ¹³Sare' darevinyi. Nemi sariminyina yagaala ge' yida'daanyaina mi'. Aawa. Yagaalya' sarimi yiniga wi'na dangadivisagaa' yagaala savire aaya kaavilyavi jawiranganyideihilyi sa' sahiri'na. Yunegaa' sarimi neminyina nebulya'na jawiryideihilyireva diraginna limwadi yemwaaihe. ¹⁴Sinnawi sagaa' neminyina maali'na yawiretabaaibi' yi yunegaa' nebulya'na jawiryideihilyi. Yi daresi. Nemire Naanga Jizaazare Yirikeriki sarimire nayaa dimwaalyide'na nemi sariminyine yaya' munyaba makilaadevaabi' yi sarimi nemi Gotiyare yagaalya' makaboinaavine yaya' munyaba dimakilyideihilyi.

¹⁵ Yi simunya dazasarevi diraginna dara yawirakiwa'de. Sinnawi sariminyawidaasi wideinyira. "Yi pigasaai yanga gaimwange! maapika!" da'muji sariminyawinna ayina wideinyira. ¹⁶ Yi saba nimi mwaala'muji yihyahalya'mava'muji Maazathoniyana kaanya yamarya'na wideinyi. Yi Maazathoniya yagalya'mava'muji pigasaai sariminyawinna ayahi bideinyi. Yi nimi sariminyina yawi'manige. Niminyi kamaranyaasapiji nimi Juthiyana wide'nanyi. Sara yawirakiwa'de. ¹⁷ Gatha'darevaka! Sara yawirakiwa'de kiri' sariminyawinna mabiwa'de. Sarevidaa'nyi nimi yagaalya' gazare diwa'deinyi daaka! Aawa. "Sara yideinyi," nebwin dadinyainyi. A'mweraavire kilaakejikiyabwina yawirakadinya "Nimi yagaala dadi 'Yo! Yo!' kiri' 'Aawa! Aawa!' simunyavi yawirima!" dadi yawirakadinyainyi daa! Aawa. "Sara yideinyi," dena yiwa'deinyi. ¹⁸ Gotiyai nebulyabwi limwaga'devi nemi kwainaji nebulya'na widadaanyainera. Yi yagaala sa' sariminyine' yihithadaanya' maangevi "Yo!" wa'dori kiri' simunyavi "Aawa!" yawi'manigo' mi'. ¹⁹ Sare' darevinyi. Gotiyai nebulya'na yadere Gawaalivaangei Kiraazitiyai Jizaazarina sariminyaba nemi yihiziwaakolyi. Yi nimiji Saailaazalyi Timotilyi saina yihiziwaakoi sahwai pigaa' "Yayo!" pigaa' "Aawano!" kininnakei mi'. Aawa. Yuyagaa' sahwai gamire yune naanga nebulya'na daka yuya sangina "Yayo!" kininnakelyi. Yuyagaa' nebulyabwi kininnakelyi. ²⁰ Sare' darevinyi. Gotiyai yune naanga nebulya'na wijaake gazasa' yi Kiraazitiyai "Yayo!" daka yunebanna sara yakelyi. Sahwari kumire "Yayo!" wiwari!. Sarevidaa'nyi Kiraazitiyari Gotiyai yune naanga nebulya'na wijaake yunebanna yima'nake'na Gotiyarine yaya' makilya'neina Gotiyari widadaanyi. Nebulyasi. Sara yima'nana! ²¹ Yi Kiraazitiyari wilamwaihovi neminyi yi sarimi kwaihiriji diraginya neyivaimwadei yi yune gami sai Gotiyalyi. Yi sai neminyi dahilakya'nei gannya Kuryari nemire minyaginyangi dingakelyi. ²² Sahwai neminyina yawi'na "Sahwara diraginna dara yawipika! 'Nebulyasi. Nemi Gotiyareinera. Neminyi diraginna nemaredaa'deiner.' " Sara yawi'na yaka gamire yavikwajike' nejaavada nemi sara yima'nya'neinaavina gannya Kuryari yanga nejaavakelyi. Nabaai nemire simunyangi sinnawinya'bisai Kurya Tewaanyari nejaavakelyi. Gotiyai gannya yuya nejaaya'nenna Kurya Tewaanyai pimaginya naangeva' mena nejaavakelyi. Yi nemi dara yawi'daanyi. Naanga nebulya'nanyasi. Gotiyai gannya Kurya Tewaanyari nejaavake'na divi yuya nejaavadeliyi. ²³ Nabaai nimi sainyi Gotiyai sasarei niminyine jalikurakya'neri jaka widiwa. Yi nimi kwaasi diwija' nimire gaalyabwi yiwawadesi. Kiri' aawa. Nimi naanga nebulya'na divanige. Nimi sariminyi yavada'gaidi taanginya ayina wijaaya'na "Aala!" diwa'de. Sarevidaasi "Sariminyawi Koridina bideinyi," diwa'de kiri' nimi yarai wiwa'deinyi mi'. ²⁴ Sare kirivi nemi sarimire limwangeburi diraginna mamareyihimwaalyigo. Aawa. Sarimire

yilaayabwi marima'naabya'na nemi yihye'mwannayihivaimwadaanyaine. Sare' darevinyi. Kiraazitiyari diraginna limwangeburi sarimi diraginna mena daa'manigasaihilyi.

2 ¹Yi ninnya yune simunyavinanya' mena wi'na dara diwa. Nimi sariminyawinna sariminyi munyi' taanga yivalakya'na ayahi mwiyi yideinyi. Dena mwiyiwa'de. ²Sare' darevinyi. Nimi sariminyi munyi' taanginya yihizaaviwija' yi nimire simunya' yilaaya ya'na yiniga wi'na aaihwai yannelaka! Aawa. Sarimire munyi' taanga mena yihivalakiwija' yi nimire simunya' yilaaya nyivalya'nera a'mwera pwara mi'. ³Sarimi a'mweihi niminyi yilaaya nyigaibineihilyi. Sarevi sariminyawinna sarimire kayaa'nanya' wanganaawiwiji kwaji sariminyina nimire munyi' taanga kamaa'mudika! "Mi'na kyavada'galapiri wideinyi," dena sariminyawinna wiwa'deinyi mi'. Sahirisavine'na kigaa' paaziya' nimi yihithave. Yi nimi sarimi yuyaihirina diraginna dara limwamwa'de. Nimi pininna yilaaya yiwija' yi sarimi yuyaihi yilaaya avaina yadivisaihilyi. ⁴Sare' darevinyi. Sagaa' sarimire mwaalyabwina nimire munyi' taanginya naangesi nimire simunya' daanga naangesi kininnakeinyi nabaai kidalaalya kwalaalyangi pikarya yihithave. Paaziya daza' "Sariminyi munyi' yune taanga wivalakima!" majena yihithave'na mi'. Aawa. "Sarimi 'O Polimi neminyina tewaanya naanga wivu'nivanikelyi,' yawirangabika!" dena yihithayesi.

Pwai gannya yiwetawakya' wiagalya'mavakeri ayina maaresa'nesi.

⁵A'mwe akwai gamirebwina kya' kale neyadaa'nyi sai yune nimi gaveinyi kale sa' manyivani!. Aawa. Sahwarina kale kibawenna yuyaihiri yihivani!. Nimi "Savina taanginya naanga nujaaviwidika!" yagaala dena "Kibawenna," yihithiwe'nanyi. ⁶A'mwe dazareri a'mwe kwalaalyaihi mi'na yeve' yi sa' sari wi'nanne' tiviki'mwa'daasasi. ⁷Sarevidaasi yi dahaa' sarimi mudika piri' pibwi jila! Yi sawhai gannya kayaa'nanyaburina kale nayaa wiadaa'nyi gamire kayaa'nanya sa' yange'na marasi'napiji sawhare simunyavi kave nayaa jivaimwagila! Munyi' taanga naanga naange' nebulya'na nagalavilawakadika a'mwe dazari! ⁸Sarevidaasi yi nimi yaamiji diraginna dara divanige. Sawhari sarimire kale ya sabwi ayina jivwaridaakwila! ⁹Sare' dare'nanyi. "Sarimi nimire yagaalya' yuna midibizaihi daaka?" dena sariminyi yaamiji yijiwaalya'ne! "Yawiranganide'nanyi," dena sinnawi pikarya piri' a'mwe sarinaji nimi yidavesi. ¹⁰Yi nabaai sarimi a'mwe sari wagilya' marasi'niwa'daasa' yi nimi kwainyi marasi'niweinyi. Sare' darevinyi. Nimi wagilya marasi'nya'ne kininnakeinyi daakaji yi sa Kiraazitiyare tinnyari gaimwanga yihya'neinyi nimi marasi'niwengi. ¹¹Nemi nayaa sara yaana! "Saataani neminyi kwaasi neyoji nanevilawakadika!" dawaaji sara yaana! Sare' darevinyi. Sawhare simunya kayaa'nanyabwi mena yawi'daanyaine. Sare'na taanga naanga sarine nayaa marasi'naana!

Gotiyare nelimwagarika mudikevine widaayadivisaraavinesi.

¹²Pigaasagaa' anga Tirawaazina Kiraazitiyare yagaala tewaanya' wijiwaakya'neinyi bi'mavena yi Naangei niminyi tusa' yiniga wi'na wijiwaakya'na kanyibaasiwa'di' wijiwaakiwa'de. ¹³Kiri' nimire simunya' kave mwariwa'di'. Niminyi nya'mwei Taaitazai anga sabanna sariminyine yagaala mamakabyakeri tinna mwanganyiwa'de. Aawa. Simunya kwalaalya yawi'di Tirawaazi mwaalyaraavi nayaa yagalya'ma'na yena Piroviji Maazathoniyana bena bi'ma'mwa'de.

¹⁴Kiri' saba Taaitazari sariminyine kadika wi'niwa'de'na Gotiyari nimi suya widivanige. Kiraazitiyai yuya kayaa'nanyangiji yuya kayaa'nanyaraaviji malyavi mena dathiwagakevidaa'nyi yuyagaa' Gotiyai Kiraazitiyariji yaaraya neyadaa'nyi yilaaya yiwadaanyaine. Yi sahwai gamire yagaalya' nejiwaakada yi yuya pimagi wijiwakamaryadaawoji a'mweraavina Kiraazitiyari wibwaridaakwadelyi. Yawita daza' sa' wabatirinya' yuneba winigode'bisasi. ¹⁵Sare' dare'nanyi. Kiraazitiyarina wijiwakamaryadaanya' wabatirinya' Kiraazitiyari yima'naabada yi Gotiyaryawinna wawode'bisaine. Nemi wijiwakamaryadaanyagaa' Kiraazitiyai wivadaihasamaa'manikeraaviji pwara kayaaka yigainivanigasaraaviji saraayawinna tirinya' wawodesi. ¹⁶Yi piri' daresi. Sahwara kayaaka yigainivanigasaraavi yi sa' barya'ne tirinyasi. Yi sa' baryabwi sahwaraavi marima'naabathesi. Yi piri' daresi. Pwara wivadaihasamaa'manikeraavi sa' gaalyabwine tirinyasi. Yi sa' sahwaraavi gaalyabwi marima'naabathesi. We!! Wawinya daza' gannya diraginyavi yiniga wi'na aaihwai yannelaka! ¹⁷Sare kiri' darevinyi. A'mwe kwalaalyara nigwia maa'nya'nera Gotiyare yagaalya' yaasiwa' wijiwaakadivitabaabitaina mi'. Aawa. Nemi Gotiyare wawinya daza' ma'daa yi nemi yaasiwa' kwaasi yagaala damaryadaanyaina mi'. Aawa. Nemi gamire yagaala yuya yida'na mijiwodaanyangi. Nemi Kiraazitiyari wilamwaihoina yi Gotiyare tinnyari Gotiyarine jalikurakadaa wijiwaakivanigo.

3 ¹Nemi ayahi yamaasa' yadaa yune neminne yaya'na munyaba dahamakimanigo! A'mwe pwara paaziya' kuminne yaya' makilya'ne' limwamanigatabaabi' a'mwera paaziya sabisa' neminyine' yihidavesa' negaininikeina dingaka! Sarimi sasare pikarya neminyine' nayaa jithavide' negaininikeina dingaka! ²Paaziya neminne yayavi munyaba makilya'ne sa' yi sarimi sahwaihilyira. Yi paaziya dazavire pikarya sa' yi nimire simunyavi wilari'. Yi dara yawi'dinyainyi. Sarimi yivanigasabwi paaziya'bisabwina dara dini' "Poli Gotiyare wawinya' nayaa yadelyira." A'mwe yuyara paaziya daza' yawirangadivi' yi sahwara dangadivisaihilyi. ³Sariminyawi nemi nayaa yihithaayo saihi Kiraazitiyai pikarya yidavakeihi ku'maayaba marima'naabahesasi. Yi paaziya

daza' sahwai yigiyasi yidavaka' mi'. Aawa. Gotiyai gaalya' kininnakere Kuryalyi sahwai pikarya yidavakesi. Sahwai sipadasikaari Gotiyai yidayaakabaaibi' pwaipwairiramaarakana yidavaka' mi'. Aawa. Gannya yikwia' kilaakejikiya simunyangi yidavakesi. Yi sarimire simunyangi yidavakesi.

⁴Aaya kaavila dazavire yagaalya' yi daresi. Kiraazitiyai negaimwagya'nei gannya diraginya' nejaavani'. Sare'na lika mi yadaa Gotiyari nebulya'na limwadaa sara nayaa yoinera. Nemire simunya diraginya' sasarevidaa'nyinyi. ⁵Nebulyasi. Yune nemi sainana yiniga wi'na yaanneina mi'. Sarevi yi “Yune nemi sainaavidaa'nyi nawi'nya pini marima'naabadeinera!” madaanna! Aawa. Gotiyai gave pwainanyai sahwai neminyine yiniga wi'na yaanne' wakadelyi. ⁶Yi nemi Gotiyare yagaala nelimwagarika mudikevi widayadaanyaina yiniga wi'na yaanneinaavi nayaa neyimavimwaaihatelyi sahwai. Yagaala nelimwagarika daza' Kiwinyavine pikarya yida'nika sa'bita' mi'. Aawa. Sa' yune Kurya Tewaanya sarengi. Sare' darevinyi. Kiwinyavire pikarya a'mweraavi dara wibwaridaakwadesi. Galazekivaimwaana! Divaideiginyi. Kiri' Kurya Tewaanyai yagaala tewaanyavina a'mweraavina gaalyabwi wijaavadelyi.

Gotiyare yagaala nelimwagarika mudikevire byaanna diraginyavinesi.

⁷Yi Kiwinya dazavine' Gotiyai silyari yidayaake' yi dazavire wawinya' baryabwi marima'naabakebulyi. Nabaai wawinya daza' Gotiyare byaanna diraginya kirisi yima'nakesi. Sarevidaa'nyi Ne Mozizare sinnyi' byaanna diraginya' wannakiki. Yizireliyara byaanna diraginya dazavina sahwara sinnyiki yiniga wi'na baihanareta' mi'. Byaanna diraginya daza' maalika wannyina yaka divi yiwawaka, kiri' yiniga wi'na baihanareta' mi'. ⁸Yi kigaa' wawinya sare' byaanna diraginya' kininnakesi. Yi Gotiyai Kurya Tewaanyari a'mweraavina wijaaya'ne wawinya' yi sa' dazavi wawila'da Gotiyare byaanna diraginya' naanga naanga maa'de' daaka! ⁹Sare' darevinyi. Kiwinya dazavire wawinya' diraginna nejida'daa'nyi nemi dina “Kayaa'nanyabwina nemi baryabwi maraanneinera.” Yi sare' kiri' Gotiyare byaanna diraginya' kininnakesi. Sarevidaa'nyi yagaala mudika dazavire wawinya' dade' “Kurya Tewaanyarina sahwara yida'maraangerera,” yi daza' Gotiyare byaanna diraginya naange' kininnake' wawinya piriwi naanna wawila'desi. ¹⁰Sare' darevinyi. Yi Kiwinyavire wawinya' byaanna diraginya' maryaakesi. Yi sare' dahaa' kunesira. Wawinya mudika daza' yi savi yune diraginna wawila'da nemi yawi'daanyi. Yagaala mudikevire byaanna diraginya yune naange' warikevidaa'nyi Kiwinyavire' mwarika! ¹¹Sare' darevinyi. Kiwinyavi wawinya daza' Gotiyare byaanna diraginyasi yima'nake' mena yiwia'nesi. Kiri' Kuryarine wawinya daza' Gotiyare byaanna diraginya' kininnake'

yuyagaa' waragwothesi. Sare'na sahiri' ayavi yune naanga naanga wavila'desi.

¹² Sarevidaa'nyi yagaala sare' kininnakeina “Byaanna sa' waragode'nana,” diraginna limwadaa nemi lika mi yadaa ku'maayaba yagaala sa' nayaa yida'na jalikurakadaanyaine. ¹³ Nemi Mozizaibi' yadaanyaina mi'. Sahwai gannya sinnyiki kwaabihannyabaalyi kawaaka yirakinakelyi. Yi byaanna diraginya daza' maali'na yiwina yaka yinahu naanga yuya' yiwina yaake'na “Yizireliyara sa' tinna nanyangabithika!” daka kawaaka yirakinakelyi. ¹⁴ Yi Mozizare wawinya' sahvara nayaa myawiri. Aawa. Kumire simunya nebulya'na bipale'na yakengi. Sare' darevinyi. Yuyagaa' sahvara Gotiyare yagaala wilimwagaraka ayavire yagaalya' dangadivi' yi yagaala savi kwaabihannya daza' kuna wari'. Yi dahaakigaasi kuna mu'nyadiviki. Sahvara kwaabihannya sa' mamarasi'nyasi. Yi Kiraazitiyai gave pwainanyari sahwarina Gotiyai daza' marasi'delyi. ¹⁵ Aawa. Gazagaasagaa' sahvara Mozizare yagaalya' dangadivi' kwaabihannyabaai kumire simunyangi bwakalimwagari'. Sahvara myawiryadiviki. Yi dahaakigaasi kunanyi. ¹⁶ Kiri' gazagaasagaa' pwai kwai Naangeryawinna kaginyiwagozi yi sahvari simunyavi kwaabihannya daza' marasi'nadelyi. ¹⁷ Yi Naangei sai Kuryalyira. Nabaai Naangere Kuryai a'mwe pwari mwaali'. Yi aawa, yuya pini yagaala wijimwagaraka ayavi a'mwe sahvari wila yirakivanikai mi'. Aawa. Sai sahibanna tewaanna mwaali'. ¹⁸ Yi nemi yuyaina nemire sinnyikaavi lika yulyakya'ne maayaina mwaaihoinera. A'mwera sinimwavananya yennadivitabaabi' nemi Naangere byaanna diraginya' wangadaa Naangere a'mabaalyaina yima'nivanigo. Yi Naanga sahwai, Kuryai gannya byaanna diraginya daza' nayaa marima'naabya neyadaa'nyi yuyagaa' nemi byaanna diraginya' naanga naanga ma'daanyaine. Yi Naangere a'mabaalyaina kuna yima'nadaanyaine.

4 ¹ Sarevi Gotiyai kale'na negaimwagakabaaibi' wawinya nawi'nya daza' widayadaanyainaavina nejaavakesi. Savi yi nemi wawinya daza'na diraginna dadaa maa'na neyideina mi'. ² Aawa. Nemi wagila kininnakebwi lika yulyarikeburi bule'nanya' mena wijavadaanyaine. Nemi kwaasiya saburi yamaryadaanyaina mi'. Sara myadaa yi nemi Gotiyare yagaalya' maravila'nya yadaanyaina mi'. Aawa. Nemi Gotiyari tinnyari yagaala nebulya'nanya' ku'maayabanna marima'naabya yadaanya' yi a'mweraavire simunya gazarizari dara yibwakidivisasi. Yi apozeliyara sareraavine yaya' munyaba makilaana! ³ Kiri' nemi yagaala tewaanya daza' wijiwakadaanya savi kawaaka yirakinaja' yi sa' a'mwe saba sana yiwina ya'neraavina kawaaka yirakivanikesi. ⁴ Yi dathahaasaraavire gotiyai Saataani a'mwe sahvara Kiraazitiyari malimwagyadivita dazaraavire simunyangi gidiravalimwagata yadelyi. Yi yagaala tewaanyavine' Kiraazitiyare byaanna diraginyavire baake'

kumire simunyangi yiniga wi'na wannade' mi'. Yi sarevi tihiralimwagata yadelyi. Yi sahvara Kiraazitiyari tinna mwanganyadivisyali. Yi sai Gotiyare a'mabaala nebulya'nanyalyi. ⁵Sare' darevinyi. Nemi yagaalya' yune neminyine' wijiwakadaanyaina mi'. Aawa. Nemi yagaalya' dara jalikurakadaanyaine. Kiraazitiyai Jizaazai sai Naangelyi. Yi Jizaazarina nemi sarimire yihithayadaanyainera. ⁶Sare' dare'nanyi. Sinnawi Gotiyai mena jaakelyi "Jihinyavidaasi baake' mwadana!" Yi Gotiyai sarei gamire baake' neminyine simunyangi banemwadakesi. Gotiyare byaanna diraginya' Kiraazitiyare sinnyiki warike' nemi yawiranganya'neinaavina baaka sa' banemwadakesi.

⁷Nabaai kiri' nawi'nya daza' kininnakeina, kwadika yaasiwa'nanyaraavi Gotiyai nawi'nya daza' maradingikakabaabisaine. Gotiyai "A'mwe yuyara diraginya nawi'nyaange' yawirangabika!" kada' dara yima'nakesi. Diraginya naanga daza' yune nawi'nya' yi sa' Gotiyare diraginyasi. Sa' yi nemire' mi'. ⁸Yi nemire wawinya' yadaa yuyanna neminyi taange' neyima'nadeine. Sare kiri' sa' kayaaka nebulya'na neyigalakadeina mi'. Yawita kwalaalya nemire simunyangi nerihiralimwaga'dengi. Sare kiri' nemire simunya yunebanna yiwiya yada mi'. ⁹A'mwera "Sahwaraavi kayaaka yigalaana!" dadivi' nega'mijamakwodivisyaine. Sara neyadaapiri kiri' Gotiyai neminyi neyagalya'ma'dei mi'. Sahwara neminyi mala neradaapiri wala'daanyaine. Sare kiri' Gotiyai negaimwadaa'nyi nemi kayaaka nebulya'na yidaanyaina mi'. ¹⁰Yuyagaa' nennya kilaakejikaavi Jizaazare baryabwi ma'daanyaine. Yadaa kaanya yamaryadaanyaine. Gotiyai neminyina "Jizaazare gaala sabwi kibulyi kumire kilaakejikaavi ku'maayabanna yima'naabana!" kada' sareina kaanya yamaryadaanyaine. ¹¹Sare' darevinyi. Yuyagaa' gaala mwaidaanyainaavi Jizaazarina a'mwera a'mwatamakya saza baryaburi nemarimwangadivisyaine. Gotiyai neminyina "Jizaazare gaala kibwi yi kumire kilaakeji' balya'nejiki ku'maayaba marima'naabana!" kada' nemarimwangadivisyaine. ¹²Sarevi barya sabwi neminyi neyadesi. Kiri' Gotiyai gaalyabwina sariminyi yihyadevulyi.

¹³Neminyina Kuryai diraginna limwangebwi nejaavakeine. Yi sasare dazabwi Gotiyare bukuya' yida'nikabaaibisari avaina wijayaakesi. Yi dara dini' "Nimi Gotiyari diraginna mena limwagevi yi yagaalya' wideinyi." Limwanga avaalyabwi maaroina kwainaji diraginna limwadaanyavi yagaalya' widadaanyaine. ¹⁴Yi nemi mena diraginna yawi'manigo. Gotiyai Naanga Jizaazari yidikaavakei yi sahwai nemi Jizaazalyiya kwainavi neyidikaavadelyi. Yi neminyiji sariminyiji sainaavi nemakwwoji gaminyaba gidihusaba nemwaihadelai. ¹⁵Sare' darevinyi. Yuya daza sariminyi gaimwagya'ne neyima'nivanikengi. Gotiyai "Nimire yanga gaimwangebwi a'mwe kwalaalya naanga

naangeraavi yunebanna wiwarana!” kada' sara neyima'nivanikengi. Yi yuya sahwara Gotiyari suya naanga naange yipi'de'nanyi. Sara yadivi' gaminyine yaya' munyabanna makibi'dere.

¹⁶Dazahirivi yi nemi Gotiyare yagaalya' diraginna dadaa maa'na neyideina mi'. Aawa. Nemire kilaakeji' kayaaka kuna yade kiri' yuya yirika sariki yuyagaa' nemire kuryai mudikei diraginyai yima'nadelyi. ¹⁷Yi daresi. Gotiyarina nemi dara yawi'daanyi. Taanga neminyi neyima'nade daza' wana maalikesi. Yi sa' wana kibawe maalikegaa' waradesi. Nabaai taanga wana maalika sa' divi sagaa' neminyine wana nawi'nya' byaanna diraginya naange' kininnake' marima'naabathesi. Nabaai wana nawi'nya' taanginya maalitaaya savi yuna wavila'de' yi yuyagaa' yuyagaa'nesi. ¹⁸Yi nemi Kwaaka davakiyangi taanginyangiji tinnyalyi wangadaanyangi diraginna myawiranganyadaanyaine. Aawa. Sigunyaviyangi tinnyalyi mwanganyadaanyangi diraginna yawirangadaanyaine. Sare' darevinyi. Yuya nemi tinnyalyi wangadaanya sa yune maalikegaa'na waradengi. Yi daza tinnyalyi mwanganyadaanya sa, sa yuyagaa' yuyagaa' waradengi. Sara yawi'daa diraginna dadaa maa'na neyideina mi'.

5 ¹Sare' darevinyi. Nemi Apozeliyaina mena dara yawi'manigo. Kwaaka davakiya kilaakeji' siminangebita savi wilamwaaiho. Nabaai sa' wo'dalasi'na yinaja' yi nemi ange' piri' kininnakeine. Yi sa' Gotiyai nejaavadesi. Anga daza' a'mwera asaji mannika'na mi'. Sa' Sigunyavi warike'na yada yuyagaa' yuyagaa' waragwothe'na. ²Sare' darevinyi. Dahaa' nemi anga davi simuyiwaala yawi'mwaainivanigo. Nemi tewaanya diraginna dara nevu'nivanike'nanyi. Nemire anga daza' Sigunyavi warika daza'na sara wa'da nemire kilaakejiki baazi'ma'nya'bi' bwakalimwagata neya'ne'na simuyiwaala yawi'mwaainivanigo. ³Nebulyasi. Divi anga daza' Gotiyai tivi'na bwakalimwagata neyaja' nemire kuryara kunera yaasiwa'na mwaabinera mi'. ⁴Sare' dare'nanyi. Nebulyasi. Nemi siminanga dazavi kuna mwaaihoina Sigunyaviyavina taanginya yibwakidaa simuyiwaala yawi'mwaainivanigo. “Nemi kilaaka sinnawinyaji' yagalya'mavaana!” myawirivanigo. Aawa. Sa' maalikesi. Nemi “Kilaaka gaala nebulya'nanya dazaji' kilaaka barya ya'ne dazajiki naanga naanga galawilawakana!” dawaaji baazi'ma'nya mudike'bi' baazi'ma'naade'nanyi. Yi sare' naangesi. ⁵Gotiyai gami sai neminyi gaala dazahiri' maarya'neinaavi mena neyoviravamwaaiahakelyi. Yi sahwai Kurya Tewaanyari mena nejaavakelyi. Kurya Tewaanya sai divi Gotiyai yuya nejaaya'ne pimaginya aaya mudi'nanya sa'bisalyi. Yi Gotiyai sahwari mena nejaavake'na nemi dara yawi'manigo. Naanga nebulyasi. Sahwai gamire yuya nayaa nejaavadelyi.

⁶Sarevidaa'nyi yi nemire kilaaka mudikeji' nejaavade daza' yuyagaa' nemire simunya' diraginya neyivaimwadesi. Nemi dara yawi'manigo.

Dahaa' nemire kilaakeji' ange'bisavi mwaaiho'na Naangeri yibwa'nona sahwalyi gamire angeba mye'mwannamwaalyigo. ⁷Sare' darevinyi. Dahaa' nemi gaminyi limwaga'daa yamarivanigo. Nemi sahwari tinna mwanganyadaa yamarivanigo. ⁸Yi nemi diraginya neyivaimwannikeine. Sara tivi'na diwo. Nabaai neminyi tewaanya dara nevu'nivani' "Kilaaka dathazikidaasi yibwa'nawaaji Naangeryawinna gamire angebanna sahwalyi tewaanna ye'mwannamwalaade'nanyi. Yi sa' tewaanyasi." ⁹Sarevi nemi simunya diraginna yawi'daanyaine. Yi nabaai nemi sahwalyi ye'mwannemwalaaja' yi nemire anga nebulya'nanyavi yibwa'naaja' Naangerina yuya sabura ya'na sahwari yilaaya wigalaade' naangesira. ¹⁰Sare' darevinyi. Kiraazitiyai yawibwarya'ne namwaalyisavi nemi yuyaina ku'maayabanna nayaa yima'nabaatheine. Yi nabaai nemijiya gazaizarina Gotiyai "Tewaanyabwina yadei yi sai kilaakejiki wilamwaaida yakebwina tivikita nawi'nya maarana! Nabaai pwai sagaa' kayaa'nanyabwi yadei yi gannyabwina tivikita kayaa'nanya maarana!" kadozi sahiba davaadeine.

**Apozeliyara Kiraazitiyai Gotiyariji avaaizimunya'na
neye'mwagakeburi widaayadivisavinesi.**

¹¹Sarevidaa'nyi Naangere diraginyavina lika yabwi yawi'daa a'mweraavire simunya dihaa'bwata yadaanyaine. Yi Kiraazitiyari diraginna limwabi'de'na widadaanyaine. Kiri' Gotiyare tinnyari nemire tewaanyabwi ku'maayabanna mena yima'naaba'. Yi nabaai nemi dara limwamanige. Sarimi kwaihire simunyara padaihirakyaaraavi sabwi ku'maayabanna yima'naabake' dingaka? ¹²Yagaala dazavi sarimi neminyina "A'mwe nawi'nyarera," dineyawiryide'na mihizivanigo. Aawa. Yi daza' sarimi neminne yaya' munyaba makilya'neihire tusa' baasivanigo. Kiri' sarimi sahirina mi'. A'mwe pwaraavinanyi. Yi sahwara yune kunnya sinna mwasimaginyavina kumire yaya' munyaba yaasiwa' makinadivisare. Sahwara simunyavina yaya' munyaba nayaa mamakinyadivisaraavinanyi. Yi sahwaraavi yiniga wi'na wirivikipine'nanyi. ¹³Sare' darevinyi. Pwara neminyina dara yawipija' "Sahwara siduta maaya navi'navikera sara yivaniga'," kiri' nemi Gotiyarine'na yadaanyaine. Kiri' nemi simunya yida'na yawi'daa nemi sariminyi gaimwange'na yivanigo. ¹⁴Sare' darevinyi. Kale Kiraazitiyare yune sa'na wawinyavi neyidikaa'bwa'desi. Yi nemi mena dara yawibwa'manigo. Pwai kuminyineba yunebanna wivadaihasamaarya'nei mena balina yakevidaa'nyi yi dazavi kumi yuyara mena bainikerabisare. ¹⁵Gotiyai "A'mwe gaala mwaaihata sara yune kumi saraavina yawi'divi' mamwaaibina! Aawa. Yune sahwai kuminyine'na mena balakeri ayina yidikaavei yune sahwarina yawi'divi' gaminyi yadivisa'na mwaai'bika!" kada' yuyaraavine'na mena balina yakelyi.

¹⁶ Sarevi sagaa'daasi nemi kilaakebuliyya simunya savire saburina a'mwe aane pwari kwari mamaryawibwarivanigo. Nebulyasi. Sinnawi nemi simunya savire saburina Kiraazitiyari sara maryawibwaroina dingaka? Kiri' dahaa' sahwari nemi sasara kuna mamarayawibwarivanigo. Aawa. Gamire nawi'nyabwina nayaa yawirangamanigo. ¹⁷ Sarevi yi nabaai a'mwe kwai Kiraazitiyari wilamwaalajai yi Gotiyai a'mwe sahwari yuna mudika tewaanyari mena wimwaaihadeyi. Gaminyina sinnawinya ayabwi yuya yiwiya yadengi. Yithaanyi! Gaminyina yuya mudikebwi mena yima'naabadengi. ¹⁸ Yuya dazangi aaya kaavilyai Gotiyalyi. Yi sahwai Kiraazitiyarina kigaa' yikamaangeina mwaaloinaji gamiji avaaizimunya'na neye'mwannamwaaihakelyi. Yi nabaai sahwari gaimwagya'ne' gamire yikamaangeraavi sahwariji avaaizimunya'na ye'mwannayima'nya'ne wawinya' mena nejaavakelyi. ¹⁹ Nemire yagaalya' daresi. Gotiyai a'mwe Kwaaka davakiyara yikamaangeraavine yuya yiwetawakya yikamaangeraji avaaizimunya'na ye'mwannayima'nakesi. Yi Kiraazitiyari sahwai yuya yiwetawakya sahwara yeta sanna simunya ayahi yawirakai mi'. Yaka sai neminyi gamire yagaala daza' wijiwaakya'ne', yikamaanga sara gamiji avaaizimunya'na ye'mwannayima'nya'ne' newakakesi. ²⁰ Sarevidaa'nyi yi nemi Kiraazitiyare maangi' ma'daa sahwarineba a'mweraavi wijiwakawadaanyaine. Yi dare'. Gotiyai gami sai a'mwe yuyaraavi nemire maangisi wijiwaramaa'mani'. Kiraazitiyai gami sarine'na sahwaraavi dara yidangadaanyi. Akai, sarimi Gotiyarina yikamaanga sabwi yagalya'mavapi Gotiyalyi avaaizimunya'na yima'napiji je'mwannamwaalyila! ²¹ Sare' darevinyi. Kiraazitiyai kayaa'nanyabwi maayai kiri' Gotiyai yuya kayaa'nanya nemire sa mari'bwaraka yune sarina munyaba yilakaka yi sahwari kayaa'a'mwe nebulya'nanyari wimwaaihakelyi. Neminyina Gotiyai "Kiraazitiyari wilamwaalya'nera nimire yida'maraangebwi kininnakera yima'nipika!" daka neminyineba sara wimwaaihakelyi.

6 ¹ Nemi Gotiyalyi wawinya ye'mwannayadaanyaina sariminyi diraginna dara yihithivanigo. Gotiyare yanga gaimwangebwi mena daape!. Akai, gaimwanga sa' sarimi yaasiwa' saba sana yagalya'ma'na nyipidika! ² Sare' darevinyi. Gotiyai jaa!. Dara dini!

"Nimire nawi'nyagaa' kadika gu'neinyi.

Yirika wivadaihasamaasa'neriki gihaimwageinyi."

Nimi yihithivanige. Yithaanyi! Dathahaasagaa' gami nawi'nyaangeaaki. Yithaanyi! Dahaa' yirika wivadaihasamaarya'neriki.

³ Yi a'mweraavire sivilyangi kurinoji sahwara walarya'ne nemi kayaa'nanya aane pir' kiri' yadaanyaina mi'. "Nemi kayaa'na yaaja' a'mwera tinna wanganapiji nemi Gotiyare yagaalya' wijiwakadaanya wawinya dazavina sahwara yagaala kayaa'nanya' nadipidika!" dona

kayaa'nanya aane piri' kiri' yadaanyaina mi'. ⁴ Aawa. Yuyangi Gotiyare widaayadivisara nayaa yadivitabaaibi' nemi yuyaraavina Gotiyare yagaalya' widadaanyavina tewaanyabwi wibwaridakwadaanyaine. Yi yuyangi dara yadaanyaine. Kwalaalyagaa' kayaa'nanyangi diraginna nebulya'na da'daanyi. Yi taanga neyima'nadaasi, yi taanginya neyima'nada, yi kayaaka yinigirasaina mwaidaanyi. ⁵ A'mwera neminyi malyaji neradivi' kalavuzana neyirakadivisaine. Yikamaangera nega'mijamakwodivi' jaka kayaa'nanya nedadivisaine. Nemi yagiyagi wawinyavi nebulya'na marulawakidaanyaine. Sawita kwalaalyangi se mwaryadaanyaine. Nemi miji'na mwaidaanyaine. Sarevidaa'nyi pwara dara yawiranganya'nanyi "Taanginya wiadaa'nyi kiri' Gotiyare wawinya' kuna yadivita sahwarana Gotiyare widaayadivita nebulya'nanyarera." ⁶ Nemi tewaanya yida'nanyabwina yadaanyaine. Yadaanyagaa' yawita nawi'nyabwi limwaga'daa mayagaala yarai dadaanyaina mi'. Nemi a'mweraavi tewaanya nawi'nya pada'galayadaanyaine. Nemi Kurya Tewaanyare yange kininnakeine. A'mwe Kirazitiyareraavina tewaanya nevu'nya sabwi yune maangi'nanya'na mi'. ⁷ Nemi yagaala nebulya'nanya' wijiwakadaanyaine. Nemi Gotiyare diraginyavi gamire wawinya' yadaanyaine. Sareinaavina pwara nayaa dara yawipine'na "O, sahwarana Gotiyare widaayadivita tewaanyara daaka!" yi nemi sara yadaanyaine. Nabaai tewaanya yida'maraangebwi limwaga'daa, aangasiri kwaari'masiraminya' wa'da kwanaamiri saabya' wa'devaabi' kayaa'nanyabulyi nemi mala tannadaanyaine. ⁸ Neminyine wawinya'na a'mwe pwara neminne yaya munyaba makidivisaine. Yi pwara neminne yaya kwaakewi marulawakadivisaine. Neminyina pwara yagaala kayaa'nanyaji bulayagaalyaji dadivisaine. Yi pwara a'mwe pwaraavi neminyina widadivisaine "Sahwarana wawinya' tewaanya yadivisarera." Apozeliyaina Gotiyare wawinya' kuna nayaa yadaanyaine. Yi a'mwe pwara neminyina yagaala ge dipija' nayaa yadaanyaine. Pwara neminyina dara yawi'divisaine "A'mwe sara kwaasi yagaala dadivisare." Kiri' aawa. Nemi yagaalya' nebulya'na dadaanyaine. ⁹ Pwara neyawirangadivitaina mi'. Kiri' a'mwe kwalaalyara neyawiranganamaa'divisaine. Nemi baidaa kiri', yithaanyi, nemi gaala kuna mwaiho. Gotiyai neminyi yavada'gala ya'nei tamamwaihaderabisaine. Kiri' sahwarana yuna maneramakyadeine. ¹⁰ Neminyi kale neyivani'. Kiri' yuyagaa' nemi yilaaya yadaanyaine. A'mwe gilyivita maayainabi' mwaidaanyaine. Kiri' nawi'nya kininnakeina nebulya'nanya a'mwe kwalaalyaraavina wijavadaanyaine. Nemi gilyivita aane pimili' kimili' kininnakeina mi'. Kiri' yuya nawi'nya gazaza limwagakoine. Yi yuya sanna yadaa dara wibwaridaakwivanigo. Sahwarana Gotiyare widayadaanya nebulya'nanyaine.

¹¹ Sarimi Koridi mwaalyaihi, nemi sariminyi yagaalya' ku'maayaba jalikurakya'neina maanga naangeva'na tavadiwo. Nemi

sariminyi maarya'neba nemire kale naanga yima'niwa'. ¹²Nemire simunya' sariminyina tihirakamaremwaala miwo. Aawa. Neminyi sariminyina tewaanya nevu'nivani'. Kiri' sarimi saihi sarinnya simunya' tihirakamaremwaaiha'. Yi nemiji avaaizimunya nebulya'na mamwaalyiga'. ¹³Ganimaangei gannya kaimiraayangi widadevaabi' dahaa' yihithivanige. Nemire dazabwina ayina tivikiryane' neminyi maarya'neba sarimi kwaihilyi sarimire kale naanga yima'nana!

¹⁴Mu'nyadivisara sahvara yi pwarabisare. Sarimi kumirebwina mye'mwannayamaripina! Yadiyi' kunnya sahvaraavire saburi gaimwanga mipina! Sare' darevinyi. Yida'maraanga sabulyi kiwinyavi galazekivala sabulyi sawaai gatha'dara ye'mwannayikadewaalaka! Baakesi jihinyasi gatha'dara ye'mwannayirakurikadewaalaka! ¹⁵Nabaai Kiraazitiyai Kamaalyalyi avaaizimunya'na ye'mwannadathei dingaka! A'mwe Kiraazitiyari diraginna limwadelyi Kiraazitiyari malimwagyadelyi saraai simunya gave piri'na limwagikaderaai daa! ¹⁶Gotiyare anga tewaanyasi kwaasigotiyaraji marirakurakipi'de' daaka! Sare' darevinyi. Nemi Kiraazitiyareina Gotiyai gaala kininnakere anga tewaanyasira. Gotiyai jaakabaaibisasi. Yi dara dini'

“Nimi sahvaraavi wilamwaalideinyi.
Sahwaraayaba kaanya yamarideinyi.
Kumire Gotiyainyi mwaalideinyi
Niminyine a'mwera mwaabi'dere.”

¹⁷Sarevi Naangei ayahi piri' jaa'

“Pwaraavi tinnyaba nayaa jahalya'mayila!
Sahwaraavi menyawi sarimi dimwaalyila!
Girikita'nanya aane piri' kiri' malimwabina!
Nimi sainyi sariminyi yihimaarideinyi.”

¹⁸ “Nimi sariminyi Sirinimaangeinyi mwaalideinyi.
Sarimi nyigwaalaangeihilyi nyiraavaangengihilyi
dimwaalyideihilyi!

Naangei diraginya yuya kininnakei sasara dadelyi.”

7 ¹Sariminyina tewaanya nyivu'nadeihi, yuya daza, Gotiyare yune naanga nebulya'na wija daza mena kininnakeine. Sarevidaa'nyi yi nemi yuya girikita'nanya kilaakejikiyaji kuryariyaji duimwagasi'naana! Sara yawaaji tewaanya yida'maraangeina mwalaana! Sare' nemi Gotiyare diraginyavina lika yadaa nawi'nya giri'maayabwi yuyagaa' yunebanna neyima'nade'nanyi.

²Sarimire simunyai neminyineba dinebasamarimwaaihila! Nemi sarimijiyi a'mwe aane pwari kwari yiwetawakya piri' myadaanyaine. Nemi aane pwai kwari kayaaka migalakyadaanyaine. Nemi aane pwai kwari kwaasi widadaa gamire gilyivisa mamwagi'nyadaanyaine. ³Nimi sariminyi yaasiwa' yagaala yihizidaya'ne' majivanige. Sare' darevinyi.

Nimi mena dara diwa. Nemire simunyavi sarimi wilamwaaiaha'. Sarevi yihigaimwagya'neina sarimi kabalapi nemi sarimiji ye'mwannabaina yaade' tewaanyasi. Yi nabaai sarimi gaala kuna kamwaalapi nemi sarimiji gaala ye'mwannamwaaia yaade' tewaanyasi. ⁴Nimi sariminyina yilaaya yadi diraginna yawi'di ku'maayaba yihizalikurakyivanige. Nimi sariminyina wi'nena sariminyine yaya' munyaba makimanige. Yuya taanginya neyima'nade sangi sarimi yiwa'daasa'na nimire kuryari yunebanna nyivaimwamani'. Nabaai yilaaya naange' niminyi yuneba yeku'nawiresi'mani'.

⁵Taanginya sare' drevinyi. Sinnawi Piroviji Maazathoniyana bi'ma'mwa'dohaa' dazimagi kimagiji nemire kilaakejiki kwaamu'na mamwaalyiwa'do. Aawa. Taanginya dala pininna pininnanya neyima'niwa'dikengi. Yi mwasimagi neminyi maiyagaalyaji maangeji warina. Yi kusimagi nemi lika yina. ⁶Sare' kiri' taanginya kininnakeraavi yivaimwadei Gotiyai neminyi neyivaimwamwa'. Yi sai Taaitazari maryasaabakei neminyabanna bi'ma'mwakevi sai nemire simunyavi neyivaimwamwa'. ⁷Taaitazai neminyabanna bi'ma'mwake'na yune dazahirivina Gotiyai neyivaimwamwake' mi yiwa'. Aawa. Sarimi Taaitazare simunyavi yivaimwanna kiwa'daa' sahwai yagaala datha' makabiwakevi Gotiyai nemi kwainaavire simunyavi neyivaimwamwa'. Taaitazai dara nediwa'. Sarimi niminyi tinna wanganya'na tewaanya yihivu'nada yi sarimire simunya' kinna divani'. Sara yadivi' nimiji avaaizimunya'na ye'mwannamwaaia'na sarimi simunya kwalaalya yawi'maniga'. Sarevidaa'nyi nimi yilaaya naanga naanga yivanige. ⁸Sare' dare'nanyi. Nimire pikariyikwiavi yagaala diraginya' sarimire kale yihigaimwa'dika kiri' yi nimi yagaala dazavina nimire simunya' taanga manyivani'. Nebulyasi. Kigaa' sagaa' simunya' taanga nyakeinyi. Kiri' dahaa' aawa. Nimi dara yawirangamanige. Paaziya daza' sariminyi simunya' kale yihigaimwa'dikesi. Kiri' nabaai sa' maalikegaa'nesi. ⁹Dahaa' nimi yilaaya yivanige. Sarimire simunyavi kale yihigaimwa'de'na yilaaya mivanige. Aawa. Simunya' kale yihigaimwa'de' sarimire simunyavi mudikebwi yawiramaa'mwa'daasa'nanyi. Sare' drevinyi. Sariminyi simunyavi kale daza' Gotiyai marayihima'niwa'daavadikesi. "Nemire paaziyaviya yagaalya' Koridi mwaalyaraavi kayaaka aane pimili' kimili' nyigalakadika!" kado Gotiyai sara yiwa'dikesi. ¹⁰Sare' drevinyi. Kale daza' Gotiyai marima'naabade daza' yi nemi a'mweinaavi simunya mudikebwi neyadesi. Yi sasare dazaburi Gotiyai neminyi nevadaihasamaa'delyi. Sarevi simunya mudikebwina nemire simunyavi taanga maneyanna! Kiri' kale wiabwi yaasiwa'nanyabwi a'mwe Kwaakevakiyaraavirebwi yi daza' baryabwi gavebwi marima'naabadesi. ¹¹Sare' drevinyi. Yithaanyi, Gotiyare kale daza' yi dazahirisa' sariminyi dala pininna pininnanya

tewaanya nawi'nyabura yihimarima'niwa'daavadikesi. Yavada'galya'na sariminyi mwolavalimwagata yihiwa'dikesi. Yi yagaa'naakeihi sarimire yagaalya yavada'gaimwa'daasange! Yi Gotiyai yihidikaa'bwa'de' yi sarimire yiwetawakya'na wagila maa'mwa'daasave! Yi Gotiyare diraginyavina lika naanga yiwa'daasave! Neminyi tinna wanganya'na sarimire simunya' simuyiwaala yiwa'dikeve! Yi tewaanya'na diraginna yadivi' kayaa'nanya'na diraginna nayaa yiwa'daasave! A'mwe dazai yiwetawakya'na tivikita naange' yiwa'daasave! Yuya sangi sarimire sabwi gamire yiwetawakya savina ku'maayaba dara yima'nivani' "Sarimi yiwetawakya' maayaihilyi."

¹² Sarevi, sinnawi sariminyi paaziya' yidave' daza', yi a'mwe dazai yiwetawakya mena yaka gave sarina yawirena yidave' mi'. Nabaai sahwai a'mwe pwari kayaa'nanyabwi yingakakerina gaverina yawireinyi mi'. Aawa. Nimi sarimire simunya diraginyabwi ku'maayabanna marima'naabya'na yidavesi. Yi Gotiyare tinnyari sarimi tewaanya nawi'nyabura neya'neihi neminyina tewaanya yihivu'nivanike'nanyi. Sarimi sara yawiramaata'ne' yidave'nanyi. ¹³ Sarevi nemire simunyavi tewaanya neyivaimwadivisaihilyi. Sare kiri' neyivaimwange' gave' mi'. Nemi yilaaya naanga yuna yivanigo. Sarimi yuyaihi tewaanna yadivi' Taaitazare kuryai kave mena yimwaahivanigasa'na sahwai yilaaya yivani'. Gamire yilaaya sasare dazabwi wangadaa yi nemiji yilaaya naanga yuna yivanigo. ¹⁴ Sare' dare'nanyi. Sinnawi nimi Taaitazari widadi sariminne yaya' munyaba makile daza'na, yiwetawakya mye'na, nimore yagaala dazavi wagila mamaariwa. Aawa. Yuya yagaala nemi yihitho daza yi naanga nebulya'nanya warikabaaibi' yi savi Taaitazaryaba sariminne yaya' munyaba makilo yagaala daza' yagaala naanga nebulya'nanyasi. ¹⁵ Taaitazai sariminyawinna kabi'mava' yi sarimi "Yiwetawakya nyaadikaji," lika yiwaaineva sahwari maaresalyi. Yi sarimi yuyaihi sahwara yagaalya' midinna yesaihilyi. Sahwai yune dazahibwina yawi'da yi gamire simunyai yawiririkirakyai sariminyawinna yuna wa'daawadelyi. ¹⁶ Dahaa' nimi nebulya' diraginna dara limwamwa. Sarimi saihi yuya yidata sabura nayaa nebulya'na jideihilyi. Yi sasare saburi nimi yilaaya yivanige.

Kiraazitiyari limwadivisara kwiya'mweraavina yanga wijaavesa'nesi.

8 ¹ Nya'mweihi, dahaa' nemi dara yihiziwiryana! Piroviji Maazathoniya Kiraazitiyare kusilaanyangiyaraavi Gotiyai yanga wigaimwadaa'nyi sahwara nawi'nyina yiwaasare. ² Kiraazitiyarina sahwaraavi taanga naange' kima'na' yi sahwaraavire simunyavi taanginya sabwi yaamiji yijiwaala yakebuli. Yijiwaala dazaburi sahwara kayaa'na nebulya'na mwaalesare. Kiri' sahwara yune yilaaya naanga nebulya'nanya' kininnakere. Nabaai sahwara yune kewewini gilyivita

maayare. Yi sarevi dazahwara piwinya kwiya'mweraavi gaimwagya'ne simunya diraginna nayaa yawiramaa'divisare. ³Sare' dare'nanyi. Nimi nayaa wangadi jalikurakivanige. Kumire nigwia maalikengi nigwia yanga wijaaya'ne kininnakera yune sara wijaavadivisare. Yo, sahiburi wavila'divi' nigwia piniji wijaavadivisare. Kunnya simunyaburi mididivi' nigwia daza wakadivisangi. ⁴Yi sahvara neminyi diraginna nedadivi' yidaanganna “Wawinya Gotiyare tewaanyara Juthiya mwaalyaraavine yanga gaimwange' nemi wijaaya'neinaavi dinejila! 'Naanga sabwi mi nyaadika!' dona yihithivanigo. Kave mwaaihasa' aawa! Kusilaanyangiya pwaraji sara yirakurayaana!” ⁵Sinnawi nemi dara limwagaro. Sahvara nigwia pini pwaraavina wijaavipi'derera. Sare kiri' yune sasare yipine'na mi'. Aawa. Aayagaa' Naangerina kuminyidaasi wijaavineva Gotiyare simunyavi mididivi' yi sara ya'nera nemi kwainaavinaji kuminyi wijaaviniwaa'. ⁶Maazathoniya mwaalyaraavine sare' nemi Taaitazari yaamiji widiwo. “Yi sinnawi sagaa' sahwai pwaraavi nigwianna wawinya wigaimwanga daza' Koridi mwaalyara ya'neraavi gaai widakabaaibi' widihaa'bwarana! Sarevi sahwarayaba yanga gaimwanga nawi'nya sa' nayaa yi'mwannana!” yawirona sara yaamiji widiwo. ⁷Yuyaburaavi sarimi yunebanna tewaanna yadivisaihilyi. Yi Kiraazitiyari diraginna yunebanna limwadivi', yi Kiraazitiyarine yagaala yuna diraginna wijiwaakadivi' yi yune simunya nawi'nya kininnakeihilyi. Yi sarevi sarimi Gotiyare wawinya ya sabwina yunebanna nebulya'na dikaa'divi' yi neminyina yunebanna nebulya'na yihivu'nadeihilyi. Yi sasare saihi yunebanna tewaanna yadivitabaabi' dahaa' “Yanga gaimwanga nawi'nya dazabwi yi, yunebanna wijaayabwi yaana!” dapiji sara jila!

⁸Savina nimi kiwinya dakya'ne' mihizivanige. Aawa. Maazathoniya mwaalyara a'mwe pwaraavina nebulya'na dikaa'divi' tewaanya yadivisanna jalikurakena sarimire kale saburi yaamiji yihivanige. Sa' nemi yawiraade'na sarimire kale sabwi sa' naanga nebulya'nanya' sahwaravire'bisasira. ⁹Sare' darevinyi. Sarimi mena dara yawi'maniga'. Nemire Naangei Jizaazai Kiraazitiyare yanga gaimwanga nawi'nyaange'na yake'nanyi. Yi sahwai nawi'nya naangengi aaya kaavilyalyi. Kiri' sariminyi gaimwanga yihya'nei gilyivita maayai yima'nakelyi. Yi sariminyina “Waryaanya sabwi limwadinyavi nawi'nya naange kininnakera yima'nipika!” daka sarei yima'nakelyira. Sara mena yawi'maniga'. ¹⁰Yi yihithivanige' kiwinya'na mi'. Dahaa' daza' nimire simunya' yihiziwaakivanige. Sare' darevinyi. Yi dare' sariminyine tewaanyasira. Kwaramenanyariki sarimi wawinya daza' mena dihaa'bwareta gave'na mi'. Aawa. Sareihi sinnawi sarimire simunyavi wawinya ya'na tewaanya kuna yihivu'nakeihilyi. ¹¹Yi nabaai dahaa' wawinya daza' ya'ne' sarimi nayaa yi'mwanniyina jideihilyi. Kigaa' daza'na simunyavi yime'nya'bi' dihaa'bwaretabaabi' sarinnya

gilyivisangina yinigevanna wi'nanya'na sarimi yunebanna yime'nya'bi' jiwagyila! ¹²Sare' darevinyi. A'mwei nigwia wijaaya'na tewaanna wivu'najai yi Gotiyai dazare sabwina tewaanya wima'nadelyi. Gotiyai yuya a'mwe dazari wiwarajanna kunya yawi'da yi sahware wijaavade sanna maryawibwa'delyi. Sahwari nigwia naanga muwarikenna marayawibwa'dei mi'. ¹³Sare' darevinyi. "Sariminyi taanginya yihyana! Pwaraavi wivwa'bwarakana!" dena yihithivanige' mi'. Aawa. Sariminyiji pwaraaviji avaina yima'nya'ne'nanyi. ¹⁴Yi dathahaasagaa' sarimire gilyivita kwalaalya yi a'mwe gilyivisanna yinahune yima'nadivisaraavi yunebanna wiadengi. "Yi sarevidaa'nyi divi sarimi gilyivisanna kune yima'nipija' yi sahwaraviji kwalaalya naanga wiwaradera sariminyi gilyivisa yunebanna yhipika!" dena yihithivanige. Yi sasare dazabwina sariminyiji sahwaraviji avaina yima'nade'nanyi. ¹⁵Sara yapiji yi dare' Gotiyare bukuyavi dinikabaabisasi. A'mwei wapaaya manaaya kwalaalya maaraka sai kwalaalya naange kininnakai mi'. Nabaai a'mwei maali'na maaraka sai wigainadei mi'. Yi sasarebaabi' naange kininnakeihi mwaabizaihi wigainaderaavina yanga duzaayila!

Taaitazalyi pwaraalyi yange'ne wawinya'na Koridina wawesa'nesi.

¹⁶Nimi Gotiyari suya widivanige. Sahwai Taaitazare simunyavi yidikaa'manikelyi. Sara yadaa'nyi Taaitazai nemibi' avaina yawi'mani'. Yi sai kwalyi sariminyine'na tewaanya wivu'nivani'. ¹⁷Sare' dare'nanyi. Sai nemire yivaimwange' maa'mwa'. Nabaai sai kwalyi wawinya savina tewaanya yaginna wivu'nivani'. Sarevidaa'nyi yune gannya saburinanya' sariminyawinna wiwaka. ¹⁸Yi nemi neya'mwe pwai maryaasiwoyai sali ye'mwanniguwaai. Yuya kusilaanya sangi neya'mwe dazai yagaala tewaanya' wijiwaakyarine yaya' munyaba makimanigasalyi. ¹⁹Nabaai yune sasare'nanya' mi'. Aawa. Kusilaanyangine a'mwera widahilakiwa'daata sai divi nemiji ye'mwannayamarya'neliyi yanga gaimwanga daza' Jeruzaalemine Kiraazitiyaraavina makwawaade'nanyi. Yi nemi wawinya widowadaanya daza' yi Naangerine byaanna diraginya' a'mweraavi yibwaridaakwa'nesi. Nabaai nemire simunya' gilyivi'maayaraavi wigaimwagya'ne daza' ya'na neyiwirivanike' yibwaridaakwa'nesi. ²⁰Nemi yanga naanga maremwala'na yivanigo savine yiwetawakya'na nyima'nadika! Sare' a'mwe aane pwai kwai yagaala kayaa'nanya' nadathika! Sarevidaa'nyi yi nemi neya'mwe dazai ye'mwannigwikade'na maryaasiwo. ²¹Sare' darevinyi. Tewaanya nawi'nya yade sabwina nemi yawirona yune Naangere tinna sarinanna mi'. Aawa. A'mwe kwaraavire tinna kwariji nayaa yivanigo. ²²Nabaai nemi neya'mwe pwai maryaasiwoyai sarei saraalyi ye'mwanniguwa'. Kwalaalya saaminyagaa' nemi sari wawinya dala pininna pininnanyangi yidakwasangadaanyalyi. Yi nemi sari tinna wangadaawoji Naangere

wawinya ya'na diraginna yadelyi. Dahaa' sai “Sarimi Koridi mwaalyaihi yune nawi'nyaangebawina jide'na,” diraginna limwaga'manikei wawinya daza' ya'na dikaa'da diraginya yaginna yivanikelyi. ²³Taaitazarina sarimi dara jawiranganyidelyi. Sai nimiji ye'mwannayadasalyi. Sariminyine'na nimiji avaiwawinyalyi. Yi neya'mwe pwaraai saraarina sarimi dara jawiranganyide. Kiraazitiyare kusilaanyangine yawisanna yadisaraalyi. Yi saraai kirinnya wawinya savina pwara Kiraazitiyarine yaya' byaannake' munyaba makidivisaraalyi. ²⁴Sarevidaa'nyi sarimire kale' saraavi nayaa jivwaridaakwila! Nabaai sarimi nawi'nya ya'ne' sariminyine yaya' munyaba makimwo sa' nebulya'nanya' jivwaridaakwila! Yi sahwaraji kusilaanya anga geva gevanya a'mweraji naanga nebulya'na yihyawirangabi'de'na sara jila!

9 ¹Sare' da'darevinyi. Yanga wijaaya' Gotiyare tewaanyaraavi widaaya'ne'na sarimi mena yawi'maniga'. Savina yi nimi yagaala saamanya' mida'muna! Sarevina manyigainyadesira. ²Sare' darevinyi. Nimi sarimire simunya' yihithikaa'manike' tivi'na yawi'manige. Yi Maazathoniya mwaalyara Kiraazitiyareraavi sariminne yaya' munyaba makidinyainyi. Yi dara widivanige. Kwarama sinnawinyavi Piroviji Giriza mwaalyara daza' aaya mudi'na yamaasa'na mena yoviravalimwagata yesare. Yi sahwaras sariminyina kadika wi'neva wawinya dazahiri' ya'na diraginya yadaapi yi daza' sahwaras kwalaalya kwaraavi yidikaavakesi. ³Sare kiri' yanga wijaaya'ne wawinya savina sariminyina yaya' munyaba makilya'na sa' yaasiwa'nanya' nyima'nadika! Sare'na sariminyawinna nya'mweraavi maryasiwaabe. Yi sinnawi nimi widevaai'bi' yi sarimi nayaa sara yoviravalimwagata jemwaalyide'na maryasiwaabe. ⁴Sariminyawinna Maazathoniya mwaalyara nimiji nye'mwannigupijara sarimi nayaa yemwaala myadapi tinna yihwangabiza'na yi nemi wagila namaraadika! Yi nabaai sarimi kwaihilyi wagila yihye'mwannamaraadeihi dingaka! Nemi sariminyina diraginna nebulya'na yawirakadaa sariminyina diraginna sara wido. ⁵Sarevidaa'nyi nimi dara yawi'mwa. Nya'mwe saraavi nimi nayaa diraginna widima! Kumi sinnawi niminyi waanapiji sariminyawinna bi'mapi'de'nanyi. Yi sarimi tewaanya naanga yanga wia'neihi mena dahesa' nayaa tivi'na yovirawakapiji ba'mujiyagaa' nigwimaaya saraavina maryasaabya'ne' mena waradesi. Yi yanga daza' tewaanya naanga yanga wia'bi' yi yemwaala yadesi. Nemi yihimwagi'nadaanya' nigwiabita' mi'.

⁶Yi pwaraavina yanga wijaayabwi daresi. A'mwei tika munne maali'na buridei, nabaai sai yune tika munne maalikenna maaradelyi. Yi a'mwe tewaanya naanga yange'na buridei, nabaai sai kwalaalya naanga yange'na maaradelyi. ⁷Sabaai'bi' sariminyidaa'nya gazaizai gannya simunyavi mena yawirakoji yi yune sahiburina midinoji sara wijaavana! Yi sai yanga wijaaya'na simunya' taanga nuyadika! Sahwai dara yawi'da “A'mwera

diraginna nyivanigasa'na yi sasare sahiburi wijaavanigeinyi,” nujaavadika! Sare' darevinyi. Nigwiyange'na a'mwei yilaaya yaderina yi Gotiyari tewaanya wivu'nivanike'nanyi. ⁸Yi Gotiyai sahwai sariminyine'na yiniga wi'na yannelyi. Yi sariminyina yanga gaimwanga yuya wijaavada yi sarimi nebulya' yunebanna yihyadeihilyi. Sahwai “Yuyagaa' yuyangi gilyivita yuyanna kininnakeihi myihigainyadeihi yiniga nebulya' wi'nanyaihi yuna mwaalina jila! Yi wawinya tewaanya yuya sa ya'neihi dimwaalyila!” dada yunebanna yihyadeihilyi. ⁹Gotiyare bukuyavi yangeraavina dara dinikabaaibisasi.

A'mwera wia burija'ne piraihirayiwinsi'namaryadivitabaabi'

A'mwei gilyivi'maayaraavina naanga yanga wijaavakelyi.

Yuyagaa' yuyagaa' sahwara yida'maraangebwi waragothelyi.

¹⁰Gotiyai wia burija'ne a'mweraavina yanga wijaavadei yi sahwai wapaaya dala pininna pininna nya'ne yihizavadaawori sareihi yuyaihi tika nayaa dinyideihilyi. Yi Gotiyai gilyivisangi (wiangi) sarimi yiniga wi'nanya pwaraavina wijaaya'neihirina yihizaavadelyi. Yi a'mwera tika wapaaya wia buridivisa yi sare naanga yima'nadevaabi' sarimire gilyivisa naanga (sila naanga, wapaaya naanga) yima'nadaa'nyi yanga nawi'nyabwi yida'maraangebwi naanna kuna jideihilyi. ¹¹Yi gazazangi sarimi gilyivita kwalaalya yunebanna yihwakadeihilyi. Gilyivita kwalaalyangidaa'nya pwaraavi yanga yiniga wi'na wijaaya'ne yihwakadeihilyi. Yi nemire wawinya savi sihumale sarimire daza' neya'mweraavi gaimwagathe'na Gotiyari “Su! Su!” widipi'dere. ¹²Sare' dare'nanyi. Gotiyare a'mwe tewaanyaraavi gaimwanga ya'ne' jide wawinya', sasare saburi sahwaraavire gilyivisanna mudaasaderaavi yunebanna yivani'. Nabaai yune sasare' mi'. Aawa. Sasare dazaburi kwalaalyara yadaapiya'na yilaayasi Gotiyari “Su! Su!” wijasi maanga yuneba wires'nawidihita yade'nanyi. ¹³Yi sarimi wawinya yivanigata daza' sarimire yadivita sabwi ku'maayaba marima'naabathesi. Yi sarimi Kiraazitiyare yagaala tewaanya' nayaa jalikurakadivisaburi kwaakewi mwaaihasa'naji yi nabaai Juthiya mwaalyaraavina yanga naange' nayaa wijavadaapi sahwara' a'mwe yuya pwara kwaraji sarimire ye'mwannayivanigasa' wangabi'de'naji yi sahwara Gotiyarine yaya' byaannake' munyaba makibi'dere. ¹⁴Nabaai sahwara yawipi'de'na “Gotiyare yanga gaimwange' wawila'nike' yihwaradesi.” Sarevi yi nabaai sahwara sariminyi wanganya'nera sariminyina tewaanya wivu'naderera. Yi sara yadivi' Gotiyari “Su! Su!” widadivi' yidaanganna kyapiji sahwai tewaanya yihyatheihilyi. ¹⁵Gotiyai gannya Gawaaliki yanga nejaavakelyi. Yanga sa' naangaangesi. Nemi daza' yiniga wi'na yunebanna yawi'daa daathe' mi'. Yi yanga daza'na nemi Gotiyari “Su! Su!” diraginna widaana!

Apozeliyaraavi kayaakyagaala widesa' Poli walamarakake'nesi.

10 ¹A'mwe pwara niminyina kwaasi yagaalya' dara dadiviki
“Sahwai nemiji neye'mwannemwaaida gami sarine yaya'

kwaakewi marima'nadelyi. Kiri' nabaai gami menyaba mwaaida sahwai yagaala diraginaange nedasaabadelyi.” Polinyi nimi sainyi Kiraazitiyare kwaamu'nanyabulyi bwiwanna maremwaalyabulyi nayaa mididi sareinyi kave diraginna yihithivanige. ²Yi dara yihidaangamanige. Dividaa'nyi nimi sariminyawinna kabi'mava'muji yi a'mwe sahwara mala nayaa yiwannipika! Akai, a'mwe sahwaraavi nimi yagaala diragina' nudiwika! Sahwara neminyina dara yawi'divisa'na “Kilaakejikiya yawita saburi yamaryadivikira,” nayaa diraginna widide'nanyi. Sara diraginna yawirangamanige! kiri' baa'nana! Simunya yarai kyavada'galayawirapiji sara myavada'galyi yihiwineinyi. ³Kilaakejikiya yawita saburi myamaryadaanyi. Sare' darevinyi. Kilaakejiki yamaryadaa kiri' kayaa'nanya neyima'nadaa'nyi kilaakejikiya yawita saburina kayaa'nanya dathiwadaanyaine. ⁴Sare' darevinyi. Yuyaji mala tannya'ne sa nemi limwagako sa kilaakejikiya yawita saburiyanna mi'. Aawa. Sa Gotiyare diragina' kininnakenna yikamaangeraavire maihurita diragina yiniga wi'na wo'dalasi'nade'na. ⁵Nemi sahwaraavire simunya wo'daidaanyaine. Nabaai yuya sabura munya ke'beva daa'da a'mwera “Gotiyari yawiranganaana!” dadivi' yadivisaraavine tusa' kaanya tih'i'devura, sabura kiburaji wo'daidaanyasi. Yi sara yadaa nemi a'mweinaavire yawita yuya sa Kiraazitiyari midinya'nengina kalavuza yiralimwaga'daanyaine. ⁶Yi nemi mena yawibwa'nona sariminyina yemwaala yigo. Sarimi nemire yuya yagaala sa dinemidinyidehaa' yi nabaai nemi yagaalya' galazekivaidivita a'mwe yuyaraavi kumire kayaa'nanyabwina wirivikiraadeine. Sareina yawiralimwagata yivanigoinera.

⁷Sarimire tinnyangi yihwarika dazanna Apozeliyainaavinenna nayaa jawiranganyila! Yi a'mwe pwai kwai yune gami sarina diraginna limwaga'da “Nimi Kiraazitiyareinyi mwaaihe,” yi sai simunya' ayahi yawirana! Gannya simunyavine'na yoji dara yawirana! “Yi nimi Kiraazitiyareinyi mwaaihebaaibi! Poliji Apozeliya pwaraji Kiraazitiyarera.” ⁸Sare' darevinyi. Naangei neminyina sarimire diraginna limwangebwi diragina yihiwagaathe'na gannya diragina' nejaavakeine. Sa' sariminyi kayaaka yihigalakaade'na mi'. Yi diragina sa'na nimi yune neminne yaya sanna makilaaja' yi sa'na wagila maarideinyi mi'. ⁹Kiri' nimi “Aala!” diwa. Sarimi niminyina dara yawi'maniga' “Gamire paazyangi neminyi lika dahaneyiri'gaimani.” Sare' sarimi yawisa'na “Aala!” dadi mi'na yihithiwa. ¹⁰Sare' dare'nanyi. A'mwe pwara niminyina dara dadivisare “Yo, gamire paaziya naanga kininnake yi yagaala diragina kininnakengi. Kiri' gami sai kabi'mavoji nemi gamire kilaakejiki tinna wangadaawori diragina maayalyi. Yi saga' gamire yagaalya' yaasiwa'nanyasi.” ¹¹Sasarera nayaa dara yawipika! Nemi sariminyi menya keibeva yibwa'nadozi yune yagaalya' sariminyina pikarya yida'daanya' yi nabaai nemi sarimiji yihye'mwannamwalaaja' nemi avaainanyabwi yagaala sa' sara yihyadaanyasi.

¹² Sare! darevinyi. Nemi simunya kwalaalya yawi'manigo. Yi "A'mwe pwarabi! avaananyainera!" nemi yiniga wi'na daanneina mi'. Sahwara yune kuminne yayanna munyaba makinadivisare. Yi nemire sabulyi akwaraavire sabulyi yiniga wi'na maryawibwaraanneina mi'. Aawa. A'mwe dazara yune kumire saburine yaamijita wakadivi' "Tewaanyainera," maryawibwa'divisare. Sahwara kumire yawisangina maryawibwa'nadivisare. Yi sarera simunya maayare. Kwaakevakiyara kunnya yawisabwina nayaa maryawibwa'nadivisara mi'. ¹³ Sahwara sara yadivi' kiri' Apozeliyaina neminne yaya' munyaba makilyavina nemire yitaasavi wawilavaadeina mi'. Aawa. Yitaata savi Gotiyai yaamijita wakada yitaasa' maryawibwaraka yanga nejaava'. Nemi yitaata yune dazahirivina mididaanyaine. Nemi sahirivi kusawi midinona sarimi kwaihiryawinna bi'mavoine. ¹⁴ Sare! darevinyi. Nemi sariminyawinna mabi'mayi yaaji kwaji nemire yitaasavi kavari'mavaadikebaabi' pilaanna nemi saina diraginna wawila'manigoina mi'. Aawa. Sare! darevinyi. Sinnawi sariminyawinna bi'mavona sariminyawinna Kiraazitiyarine yagaala tewaanya' yihimakabovina sarimi nemire yitaasavi mwaaiha'. ¹⁵ Wawinya piningi a'mwe pwara gaalyagaa' miraagikiresangina neminne yaya' mamakilyivanigo. Nemire yitaasavi Gotiyai dahilakaka wawinya savi mavari'mayona sara mi. Aawa. Nemi simunya diraginya dara yawirakivanigo. Sarimire diraginna limwangebwi sarimire simunyavi diraginaanga mena kima'noji nemire yitaasavi yinigeva wawinya sa' yunebanna yi'mwannaaade'nanyi. ¹⁶ Yi sariminyi bulyimagi mwaaihata kwaaka pimaginna Naangerina kadika mu'nyadivisaraayawinna nemi yagaala tewaanya' wijiwakamaryaade'nanyi. Nemire yitaasavi pari'makwiya yaadeina mi'. A'mwe pware yaamijita wakinikeba mena yakengina neminne yaya' yaasiwa' makilaanneina mi'. "Wawinya sa' nemi saina yagosira," majadaanyainera. ¹⁷ Aawa. "A'mwe gaminne yaya' munyaba makidei yi Naangerina gaverina nayaa sara makilana!" ¹⁸ Sare! darevinyi. A'mwe yune gannya yaya'na munyaba makilajai yi dazari Gotiyai yawiramaardei mi'. Aawa. A'mwe Naangei gamire yaya' makilajai yune a'mwe sahwari yawiramaardelyi.

Poli kwaasi apozeliyaraavirebwi ku'maayaba jalikurakake'nesi.

11 ¹ Akai, dara nyivu'nivanikeinyi. Nimi simumaaya maali'nanya yagaala kave du'nyila! Maanga yarai manyidipinera! Kiri' yihithiwe' baa'neka! Sarimi maanga maji, nayaa kave nyu'nadivisaihilyi. ² Sare! darevinyi. Gotiyaridaa'nya wivu'nyabwina sariminyine tewaanya nyivu'nadeihilyi. Gotiyai a'mweraavina "Ninnya'neraavi dahilakima!" dada yi sasare dazahiburi sariminyina diraginna yawi'manige. Sare! darevinyi. Gave pwarina kwala maa'nya'na sariminyi mena yihithahilakiweihilyi. Yi sahwai Kiraazitiyalai. Yi

sahwaihii a'mwazidiraaya tewaanya' mwaaide'bisaihiri Kiraazitiiyarina yihimaakideihilyi. ³Kiri' nabaai nimi lika dara yiwa. Kamaala sai kwaasiya sabwina simunya naanga yawi'dei sinnawi kigaa' Yivavi kwaasi yagaala sa' wijaakabaabi' sasare sabwi nayihima'nadika! Sarimire simunyangi yune Kiraazitiiyarine yawita dazabulyi yune gaminyina tewaanna yida'na yihivu'nya dazabulyi yihwarikebulyi. Akai, sarevina sarimire simunya sa kayaaka nayihigalakadika! Nimi daza'na lika yivanige. ⁴Sare' darevinyi. A'mwe kwai sariminyawinna yima'naabada Jizaaza pwarina yihiziwaakadei. Nemi yihiziwaakoyai yi Jizaazai sahwarina mi'. Yi sasare dazaburi sarimi kurya nabinanyai maa'divisaihilyi. Sinnawi sarimi maareta Kurya Tewaanya dazaina mi'. Yi sarimi yagaala tewaanya nabinanya' maa'maniga'. Sinnawi sarimi yagaala tewaanya maareta daza'na mi'. A'mwe sai sariminyi tinnyaba sasare sabwi yadei yi sahwaru kave wi'nivanigasaihile! ⁵Sare' darevinyi. Nimi dara yawi'manige. Mudikera sara yihithadivi' nabaai, "Apozeliya nawi'nyaanga wavila'nikeine," dadivisaraavi dalaangewi aane piburina kiburina maali'na wila'nata mijivanigena! ⁶Kiri' yagaala wijavi nimi nayaa miwirinikeinyi dahamwaaie? Baa'nana! Sare kiri' nimi simunya yawisa'na kuna manyimudaasivani'. Aawa. Sariminyina yuya simunya yawita yuya sa nemi yadaanya yuya saburana yihibwaridaakwo.

⁷Nimi Gotiyare yagaala tewaanya' yange'na yihiziwaakeinyi. Yi sara yadi nimi savina nigwia maareinyi mi'. "Yagaala nebulya' yihiziwaakadi sariminyi munyaba makilima!" dena nigwia mamaarya dazaburi nimi sainyi walamarake. Sara yene'na nimi dazabwi ye' yiwetawakyabwi dingaka? ⁸Kiraazitiiyare kusilaanya piningi sariminyi yihithaaya'nevi niminyi nyigaimwagya'ne nigwia maareinyi. Yi sasare saburi sahwaravire gilyivisa nimi yaasiwa' mwagi'nya'bisasi. Kumire widaayavina mi'. Sariminyine'nanyi. ⁹Sinnawi nimi sarimiji yihye'mwannemwaalena yi nimi gilyivisanna nyigainakegaa' yi dazagaa' sarimijiya a'mwe aane pwarina kwarina taanga wijaaveinyi mi'. Sare' darevinyi. Neya'mwerana Maazathonyadaa'nyara anga Koridina yi'maveva gilyivita nyigainadaasiya sahwaru yunebanna ye'. Yi gilyivita yuya nimi nayaa yavada'gainadi sariminyina nimi taanga pimili' kimili' mayihizaaye. Nabaai divi yuyagaa' yi nimi nayaa kuna sara yideinyi. ¹⁰Yagaala nebulya'nanya Kiraazitiiyare' sa' niminyi sahwayinyi nyari'. Sarevidaa'nyi yuya Piroviji Giriza simagi nimirne yaya' munyaba makidi yadinya dazabwina a'mwe aane pwai nimir tusa' yaya' makilya'ne' kaanya yiniga wi'na tihiradei mi'. ¹¹Nimi sasare sa' baari'na yivanigena? Nimi sariminyina tewaanya manyivu'nyivanikeinyi dingaka! Aawa. Gotiyai mena nyawi'mani'. Nimi sariminyi nyivu'nadeinyi. ¹²Sare kiri' "Pwara kuminne yaya' munyaba makilya'ne tusa'na 'Polimiva avaaina yadivitabaabi' sabwina biraana!' dadivi' yaamiji yina yadaapi

'Tuta sa' kaanya tihirima!' dena sarimire nigwia maa'dinyainyi mi'. Yi nabaai nimi yune sasara yideinyi." 13 Sare' darevinyi. A'mwe dazara kwaasiya apozeliyare. Sahwara kwaasi yadivisare. Sahwara kumirebwi marovinya yadivi' yune kilaakejikina "Kiraazitiyare Apozeliyainera," dahilakimaniga'. 14 Yi dazavine'na sarimi atika mamaru'napina! Sare' dare'nesi. Saataani gami sai gannya kwaasiyabwi marovinada yune kilaakejikinanya' sai baakeviya ejeliyaibi' yima'nadelyi. 15 Sasare savidaa'nyi gamire widaayadivita a'mwera kwaraji kumirebwi kwaasi marovinya yadivi' a'mwe yida'maraangebwi yadivisarabisara kwaasi yima'nadivisa' naange! daaka! Yi a'mwe sahwara dividaa'nyi kumire kwaasi yadivita sabwina tivikita kayaa'nanya maapi'dere. Kumire aayagaa'ne' kayaa'nanya sahiri' wari'.

16 Sinnawi mena yihithiwe' nimi ayahi yihithima! A'mwe pwai kwai niminyina dara nyawiradi! "Sai a'mwe simumaayalyi." Kiri' sare' yawirya'neihiri yihivu'naja' "Nimi kwainyiji simumaayaibisainyi niminne yaya' munyaba makilima!" kada'muji kave dinyu'naabyila! 17 Nimi Naangei yakebwi mamidinyadi yagaala dara majivanige. Aawa. Simumaayaibi' yagaalya' yaya' munyaba makilya'na nimi diraginna yivanige' dara dahathivanige. 18 A'mwe kwalaalyara kilaakejikiyabwi mididivi' yi kuminne yune yaya sangina munyaba makimanigasavi yi dahaa' nimi kwainyiji yaya' munyaba maal'na makilideinyi. 19 Sare' dare'nesi. Sarimi a'mwe simumaayaraavi kwaasi yagaala yihiziwaakadivisaraavi yilaaya'na kave wi'nivaniga'. Sarevi simunya tewaanya' kininnakeihi daa! 20 Sare' darevinyi. A'mwe pwai kwai gamire yaasiwa'wawinya'na yihimwagi'namakabaza' yi sai sarimire gilyivita yuya yunebanna yaja' yi sai gamire kwaasiya'na yihigalaja' yi sai kayaa'na yihibwaakaja' yi sai sarimire sidalengi mala yihiramaja' yi sara yihyadaawori sare sari kave nayaa wi'nivanigasaihile! 21 We! Sasare kayaa'nanya sabwi ya'ne sahwara yadivisanna nemi diraginya maayaine. Sarevi yi nimi savina jalikurakiwe' yi nimi wagilya' nyivwa'nanneinye!

Nabaai a'mwe pwai kwai diraginna yada gannya sabwina jalikurakadevurina yi dazahiburina nimi kwainyiji diraginya yadi jalikurakideinyi. Sara diwe' a'mwe simumaayainyibi' diwebaabisasi. 22 Sahwara Yiviruyara dingaka? Yi nimi kwainyijinyi. Ne Jaikopimidaa'nyara Yizireliyara dingaka? Yi nimi kwainyiji. Ne Eviraamimire yisiwiara dingaka? Yi nimi kwainyiji. 23 Kiraazitiyari widaayadivitara dingaka? A'mwe wana sidu'maaya yune navi'navika nebulya'nanyaibisainyi dara dima! Yi nimi wavila'dinyainyi. Yagiyagi wawinya kwalaalya naangengina wavila'na. Nimiru wawinya'na kalavuza kwalaalya naangengi yirakesangina wavila'na. A'mwera niminyi mala naange nyiradaapiri yi dazavi sahwaravaavi nebulya'na wavila'na. Kwalaalyagaa' nebawa kabaimudikeinye! 24 Yi yirika dahasaai

dahasaai dahaa' sarevi Juyara wila kayaa'nanyabaalyi nyili'bware'. Kuna nyili'bwa'divi' aaya' teti naainiyavi (39) tamidaakuna nyadiviki. Sarevi aya kiba nimi baligirasainyi. ²⁵Yirika dahasaai dahaa' Romiyara yisarikaji nyirame!. Gave pigaa' a'mwe pwara silyaji liwakina nye!. Gotiyare wawinya'na wodi yirika dahasaai dahaa' sipiya' kayaaka yinyina kya' nimi saalaalyavi yiwina kiyiwidikeinyi. Yi sarevidaa'nyi pigaa' sawita piri' yirite piri' saalaalya naangevi a'ba yilaramaryeinyi. ²⁶Nimire widaayaburi kwalaalyagaa' nimi tuta saaminyavi waweinyi. Aalya yarai bwalyawodaa'nyi yiwina kiwidikeinyi sara yeinyi. Yi a'mwe kuka yipalamaa'divisaraavire asiri saba sana yiwina kiwidikeinyi. Yi nimire yisavaakiyara Kiraazitiyarina sinna tika wida'daa'nyi niminyina “Kayaaka yigalaana!” deva sara kanyiramakipidikeinyi. Yi a'mwe ajimya piningiya pwara sara kwaraji “Kayaaka yigalaana!” deva sara kanyiramakipidikeinyi. Yi anga naangeba sara yiwina kiwidikeinyi. Yi kwaaka a'mwamaayavi sara yiwina kiwidikeinyi. Yi saalaalyavi sara yiwina kiwidikeinyi. Yi a'mwe “Nemi Kiraazitiyareinera. Ja'mweinera,” kwaasi dadivisaraavire asiri sara yiwina kiwidikeinyi. ²⁷Nimi wawinya kwalaalya yagiyagi sara yeinyi. Diraginna miraagikireinyi. Kwalaalyagaa' sawi'wawinya yadi se wareinyi mi!. Miji'na mwaalina yadi aalya'na baleinyi. Kwalaalyagaa' Kiraazitiyare wawinya'na tika wapaaya yagalya'maveinyi. Niminyi yirila nyadaa'nyi baazi'ma'nyanna kune nyima'nakeinyi. ²⁸Nabaai yune sahininanna mi!. Pini warike wavila'nikeinyina wibwaridaakuvanikengi. Yuya yirikerikaavi nimi Kiraazitiyare kusilaanya yuya sangi maremwaalya'na simunya kwalaalya yawi'dinyainyi. Yi daza' taanginya naanga nebulya'nanya' nyakivani!. ²⁹Yi a'mwei Kiraazitiyari limwadei gamire kuryai diraginya maayai yojija'na yi nimi kwainyi gamibi'na najinanyainyi ye'mwannamwaalideinyi midaaka! Yi a'mwe kayaa'nanyavi yidihwaki'naraawajai yi daza'na nimire simunyavi kale dusina, daanga naanga dike'bi' nyiginyiwannaradeinyi midaaka!

³⁰Nabaai nimi yevina “Kwalaalyanna dji,” yawi'mujainyi yi nimi dara dideinyi. Nimi diraginya maayainyira. Yi dazavina niminne yaya' munyaba nayaa makilideinyi. ³¹Gotiyai, Naanga Jizaazari Ganimaangei sahwai niminyina dara yawi'delyi “Sai kwaasi majiwa!” Nemi yuyagaa'na sahwarine yaya' munyaba makidaanyai sara yawi'delyi. ³²Yi sarimi nayaa yawiranganya'neihiri “Poli diraginya maayalyi,” yihithima! Damaazikazi saba Aaretazai Kingiyai mwaala!. Sarei kiyaapiya naangeri anga naanga Damaazikazi tikuryavi maremwaalya'neri dahilakakelyi. Yi sahwai dame daaya'nei niminyina “Kalavuza yirima!” daka nyakelyi. ³³Sara kanya' nya'mwe pwara soigilya naangevi lika wilanyimarulakeva angebanya sikurikevi munyaba dabu'nikevi niminyi wilyabaari makwasaabina nye!. Yithaa, sara kanye' nimi walaabina yina yena

likaanya wina ye. Sarevidaa'nyi yi nimi kiyaapiyare asiri makwasakena yi nimi likaanya wina ye. Saza yadinyainyi wirisainyi.

12 ¹Tusari' piri' mi'. Nimi yune niminne yaya' munyaba makimujainyi. “Nebulyasi, sasare dazabwi negaimwagathe' mi',” yawi'daanyi. Sarevi kiri' a'mabaaitinna pininnaji lika yulyakya piniji Naangei marima'naabadennaji dide'nanyi. ²Kiraazitiyari wilamwaalika pwari nimi mena yawirangadinyainyi. Yi sahwari kwarama potiniya (14) kigaa' Gotiyai gamireba Sigunyavi menya ke'mwewinna yarai yipalamakilaawa'. Ai, sai kilaa'nakei dahamwaala'? Nimi myawiriwa. Sai kilaakeji' yagalya'mata dahaya'? Nimi myawiriwa. Gotiyai yune gave sahwaina yawi'dei. ³Yi nimi a'mwe dazarina yawirangadinyainyi sahwari Gotiyai nawi'nyabanna Parathaazi wo'nikebanna makilaawakerina. Sai kilaa'nakei dahamwaala'? Sai kilaakeji' yagalya'mata dahaya'? Nimi myawiriwa. Gotiyai yawi'dei. ⁴Sigunyaba sai kadika wi'naka yagaala sangi a'mwei yiniga wi'na dannei mi'. Yi Gotiyai daza kiri'naji kimaakiya dakina. ⁵Sasareri yima'nakevina nimi gaminne yaya' munya ke'ba makilya'neinyi. Niminyine'na niminne yaya' munyaba mamakimuna! Kiri' niminyina gave piri'na dara dide'na “Nimi diraginya maayainyira,” niminne yaya' yiniga wi'na makilideinyi. ⁶Sara yiwineinyi. Sare' darevinyi. “Niminne yaya' makilima!” diwija' a'mwe navi'navikeinyibi' yideinyi mi'. Sare' darevinyi. Yi nimi yagaala nebulya'na diwineinyi. Kiri' yune niminne yaya'na mamakilyivanige. A'mwe pwai niminyina dara nyawiradika! “Poli a'mwe wana nawi'nyaangelyira.” Nimi yivanige sabwi sahwai tinna wangananneji nimi yagaala divanigengi kadika wi'nanneji sasare sahiningi simunya nayaa yida'na yawirade'na tewaanyasi. Nebulya' dingaka? Kwaasiya' dingakaji? ⁷Yi yuya daza Gotiyai nyibwaridaakwake wana naanga nebulya'nanyanna “Yi gaminne yaya' gami saina naanna namakiladika!” daka sarevidaa'nyi Gotiyai lange'bisa' daange' nimore kilaakejiki nyimulya'ne' nyijaava'. Yi daza! “Saataanimire ejeliyai Polimi mala wiramana!” daka nyijaava'. Nimi yune niminyine'na naanna namakimudi'de'na niminyi marulawakya nya'nei daanga nyividelyi. ⁸Dazavina “Naangei niminyi marasi'nana!” dena yirika dahasaai dahaa' diraginna yidaangane'nanyi. “Tewaanya mwaalima!” dena yidaangane. ⁹Kiri' nabaai sahwai dara nyida' “Nimore yanga gaimwanga naangebwi giminyi yiniga wi'nannebulyi. Darevinyi. Nimore diraginya' a'mwe diraginya maayaraavi wawinya yuna nebwinia wiadesi.” Sarevidaa'nyi “Taanga nanyadika!” madiwina! Nimi diraginya maayainyire wiritasavine yaya' munyaba makidinyainyi. “Kiraazitiyare diraginya' yune niminyi nyarana!” dadi sara yide'nanyi. ¹⁰Sarevidaa'nyi Kiraazitiyarine'na wirisangiji biraiyagaalyangiji nyigainyangiji kayaaka nyigaidengiji taanga dala pininna pininnanyangiji nimi wikira. Sare' dare'nesi. Nimi diraginya maayainyi mwaala'mujiyagaa' yi dazagaa' sagaa'na diraginya nebulya'nanya' kininnakeinyi.

¹¹Nimi navi'navikeinyi yima'niwa. Kiri' nabaai nimi yadinyabwi nayaa myawiranganyiwaasavi sarimi kyanyidika'mwa'daa' yi nimi sara yima'nena yagaala sa diwa. Sare' darevinyi. Sarimi nimirne yaya' munyaba makibiza' sa' yida'nanyabulyi. Kiri' sarimi sasara yadivitaihi mi'. Sare' darevinyi. Nimi geinyira. Kiri' mudikera “Apozeliya nawi'nyaanga wavila'nikeine,” dadivita dazaraavi dalaangewi nimi mula'narige. Aane piri' kiri' manyimudaasadeinyi. ¹²Nimire simunya' diraginya yuya yivaimwannadi sariminyaba Gotiyare wawinya' yadi apozeliya kware wijiwaainya nebulya nimi marima'naabe. Sa yi darengi. Yijiwaainya dala pininna pininnanyaji atika maru'nasaji diraginya yaji sa yima'nikengi. ¹³Sare' dare'nesi. Nimi yihye'na “Kiraazitiyare kusilaanya piningi naanga ya'. Neminyi maalika ya'.” Sara yawi'manigasaihi daaka! Nimi yadinya'na sariminyine pininna yihimudaasade dingaka! Yi yihimudaasade' gave piri'nanya' daresi. Nimi sainyi gaveinyi sariminyi taanga yihizaaveinyi mi'. Sarimire gilyivisa yihimwagi'neinyi mi'. Nimire yiwetawakya dazawaai sarimi nayaa dimarasi'nyideihile!

¹⁴Yithaanyi, dahaa' sariminyawinna dahasaai dariki bide'na nimi yemwaala yiwa. Yi nabaai taanga mihizaayadi sarimire gilyivisa yihimwagi'nideinyi mi'. Sare' dare'nesi. Sarimire gilyivisa maarya'na nimi mabiramaariwa. Aawa. Nimi sarimi sawhaihiri maarya'na nyivu'nivani'. Sare' darevinyi. Kaimiraayara sawhara kuvinimaangeyuraavi gaimwagya'neyuraavi gilyivisa mari'bwarakya'nera wawinya maayarera. Aawa. Yune kuvinimaangeyura kaimiraayaraavi gaimwagya'neyura mari'bwarakya wawinya sa' kininnakeyurera. Nimi sirinimaangeibisainyi sara yihithiwa. ¹⁵Yi yihigaimwagya'neinyi nimire gilyivita yuya wasisa'na, nimire gaala kibulyi wasisa'na. Yi sarevina nimi “Wikira,” dadinyainyi. Nimi sariminyina tewaanya naanga naanga nyivu'naja sarevidaa'nyi sahirivi tivikita ya'ne' niminyina sarimire yihivu'nyabwi yune maali'nanya' jivanika! ¹⁶Kiri' nabaai pwara sawhara niminyina dara divaniga! “Nebulyasi. Sai sarimire gilyivisa ku'maayaba maarakei mi'. Aawa. Sai a'mwe nyili'nyilika dadelyi. Yi kwaasiyaburi sai sarimire sinnyikaavi lika yulya'mwagakya yada sariminyi yihimwagi'namaara!” ¹⁷Mena maryasaabera a'mwe pwara sariminyawinna besaraavidaa'nyi kwaraavire asiri nimi kwaasi yena sarimire gilyivisa dahayihimwagi'ne! ¹⁸Nimi Taaitazari kyadikaave yi sawhai sariminyawinna bakei, yi nimi neya'mwe pwai dazai maryasaabei sali ye'mwannigwawa!. Taaitazai sai kwaasi yaka sarimirena mwagi'nakei daaka! Gamiji sainaai simunya gave avaaainanyavi kaanya yamaryolyainai midaaka! Tuta yune gave pirivina yibwaramakwadasainai midaaka!

Koridi mwaalyara yavada'gainya'neraavi “Mala nayaa jiwannyila!” widake'nesi.

¹⁹Yagaala yuya dazangi sarimi danganapiji yi neminyina jawiryideihi dingaka? “Nimire tinnyari Polimivaavi marida'maya'ne' yida'mwakelyi.”

Kiri' aawa. Gotiyare tinnyari nemi Kiraazitiyari wilamwaihoina yagaala daza divanigo. Kiri', sariminyina tewaanya nyivu'nadeihi, nemi yivanigo yuya sa, yi sariminyinenna diraginya yivaimwanga yihyadennanyi. ²⁰Sare' darevinyi. Yi nimi lika dara yivanige nayihwangamudika! Sariminyawinna bi'mava'muji “O, sahwaravina simunya nayaa yawirima!” diwija' kiri' sarimi nayaa mamwaalyi yadivi' sareihiri nayihwangamudika! Nabaai sarimi kwaihi “Poli neminyina yilaaya yana!” yawipija' kiri' nimi sainyi maanga yihiza'neinyi sareinyi nanyangabithika! Akai, sariminyaba kayaa'nanya dala pininna pininnanya dare naradika! Maanga dinyina, tiganaarya yawi'na, sinna tika davina, pimaginyavakaavi maiyagaala dina, kayaakyagaala dina, bulayagaala dina, pihadika yibwaakina, gavamarasi'nyiyagaala dadivi' yina. Nimi dazanna yipija'na lika yivanige. ²¹Akai, sariminyawinna ayahi kaba'muji yi sariminyina nimore Gotiyai niminyi nanyimarulawakadika! Yi a'mwe kwalaalyaraavi yavada'gaidi sahwaravina kinna nadiwidika! Sahwara sinnawi kayaa'nanyabwi yesara simunya mudikebwi myawiramaariwaa'. Yi sahwara kayaa'nanya girikita'nanyabwi yina, ata limwangebwi yina, dika widadaasi yina, yi sara yadivisaraavina kinna nadiwidika!

13 ¹Daha' sariminyawinna nimi bide dahasaai dahaakira. Mi'na bi'mava'muji yavada'galya'na dinike'na dara yideinyi. A'mwe pwaraai a'mwe kwaraai kwai avaa'imaangi'na kajalikulakapiji yagaala daza' diraginya wa'da yagaainakeraavi yawibwarideinyi. ²Sinnawi saga' yiwetawakya yesaraaviji sariminyi a'mwe yuya pwara kwara sara yiwa'daasaraaviji yi pigasaalyagaa' saga' nimi sarimiji yihye'mwannamwaalena “Sarimire yiwetawakyangine tivikisa'na mala nayaa jiwannyila!” yihithevaabi' yibwa'niweinyi ya'ne sabwina ayahi dara yihithivanige. Sariminyawinna ayahi ba'muri yiwetawakya yadivisaraavi yaasiwa' wanganakina yideinyi mi'. ³Sare' dathare'nanyi. Sarimi “Naanga nebulya'na yawiranganaaji 'Kiraazitiyai Polimire maangevi dathei dingakaji,' ” jawiranganyide. Kiraazitiyare diraginyavi yihyideinyi. Sahwai sariminyina wirisa'na yadei mi'. Aawa. Sahwai sariminyina diraginaangelyi. ⁴Sare' darevinyi. Kigaa' sahwai wirita kininnakeri pwara yisaviri niliya wiramesalyi. Kiri' nabaai Gotiyari diraginya kininnakei gaalyai mwaali'. Sare' datharevinyi. Nemi sahware wilamwaihovi nemi kilaakejikaavi kwainaji diraginya maayaine. Aawa. Kiri' Gotiyare diraginyavi nemi sahwalai gaala gamireina ye'mwannamwalaadeine. Yi nabaai nemi sariminyi yihyavada'galya'neina diraginya daza' marima'nabaatheine. ⁵Sarimi nayaa jawiryide'na “Nemi Kiraazitiyari limwaga'manigoina daaka?” sarinnya simunyangi yaamiji jila! Sarimi saihi sawhahiri nayaa jawiranganyila! “Neminyi Jizaazai Kiraazitiyai sawhai wilanemwaali!”

myawirivanigasaihi daa! Nabaai aawana. Yi savina sarimi kwaasiyaihiri jawirangannyideihi dingaka? ⁶Yi nimore yawita yivanige. Sarimi neminyina dineyawiranganyide yawibwata dazavi yinigeva. Kwaasiyaina mi'. ⁷Yi nemi Gotiyari yidangadaanyi. Yi sarimi kayaa'nanya aane pibwi kibwi mi jideihilyi. "Nemi yavada'galya'neina yiniga mi'nanyaina ku'maayaba nayaa yima'nabaana!" dona sara yidangadaanyaina mi'. Aawa. "Yi sarimi tewaanyabwi jila!" dona yidangadaanyi. Sare' nevu'nivani'. Nemi yiniga wi'nanyaina ku'maayaba yima'nabaadeinaavi myawiranganya'ne'na wikira. Sariminyawinna bawaaji Kiraazitiyare diraginyasi yihyavada'galaade' wikira. ⁸Sare' darevinyi. Nebulya' marulawakya'neina yiniga wi'na yaanneina mi'. Aawa. Nebulya' gaimwagya'neina yiniga wi'na yaanneinera. ⁹Nabaai sare' darevinyi. Nemi wirita kininnakeibisaina mwalaaja gazagaasagaa' nabaai sarimi diraginya' kininnakeihi mwaaibizagaa' nemi yilaaya yina yadaanyainera. Nabaai sarimi yavada'gainya'neihi tewaanya yida'maraanga nawi'nyaihi yima'nya'na yuyagaa' nemi Gotiyari widadaanyi. ¹⁰Savidaa'nyi "Nimi yibwa'niweinyi sarimiji bihye'mwannamwaala'muji Naangere diraginyasi yarai davanganasa'na mihizi yima!" dena pikarya datha' yida'mwa. Diraginya daza' Naangei nyijaavake', yi daza' diraginna limwangeburi diraginya yiwagya'nesi. Sa' yawisangi kayaaka wo'dalasi'nya'ne' mi'.

Yagaala pimagina pinnesi.

¹¹Nya'mweihi, dahaa' yagaala aaya' dima! Tewaanya dimwaalyila! Tewaanya yida'maraanga nawi'nyaihi yima'nya'neihi yavada'gainyina jila! Nimore yagaalya' nayaa wi'namidinapiji sarinnya simunyangi diraginya yivaimwannyina jila! Simunya avaananya' jawiramaarila! Kwaamu'nanyaburi dimwaalyila! Sara yadivi' yi Gotiyai tewaanya wivu'nyaburi aaya kaavilyai, kwaamu'nanyaburi aaya kaavilyai, yi sai sarimiji yihye'mwannamwaaladelyi. ¹²Sariminyi gazaizai gya'mwe pwari "Nya'mwei!" dada maangwidaayilaaya tewaanya' yana! ¹³Dava Gotiyare tewaanya yuyara sariminyi "Neya'mweihi!" yihithivaniga'.

¹⁴Naanga Jizaazai Kiraazitiyai sarimi yuyaihiri yanga gaimwange' kuna yihwakana! Gotiyari sarimi yuyaihirina tewaanya kuna wivu'nana! Kurya Tewaanyai sarimi yuyaihilyi kuna yihye'mwannamwaalana!

Poli